



Milik Departemen P dan K
Tidak diperdagangkan
Untuk umum


Sejarah Daerah Dan Suku Gayo

Abdurahim Dandy

Direktorat
Kebudayaan

Departemen Pendidikan dan Kebudayaan

1



919. 811 ABD 5

**SEJARAH DAERAH
DAN SUKU GAYO**

SEJARAH DAERAH DAN SUKU GAYO

Oleh
ABDURRAHIM DANDY

DEPARTEMEN PENDIDIKAN DAN KEBUDAYAAN
PROYEK PENERBITAN BUKU BACAAN DAN SASTRA
INDONESIA DAN DAERAH
Jakarta 1979

Penerbit
Proyek Penerbitan Buku Bacaan dan Sastra
Indonesia dan Daerah
Hak pengarang dilindungi Undang-Undang

KATA PENGANTAR

Bahagiailah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu, di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Dan penggalian karya sastra lama, yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam ini, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antar daerah, yang sangat besar artinya bagi pemeliharaan kerukunan hidup antar suku dan agama, akan dapat tercipta pula, bila sastra-sastra daerah, yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah tersebut. Kita yakin bahwa segala sesuatunya yang dapat tergali dari dalamnya tidak hanya berguna bagi daerah yang bersangkutan saja, melainkan juga akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra Daerah

Istimewa Aceh dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1979

Proyek Penerbitan Buku Bacaan dan Sastra
Indonesia dan Daerah

ISI BUKU

1.	Pendahuluan	9
2.	Ringkasan	11
3.	Kata Pendahuluan	19
4.	Sejarah Daerah dan Suku Gayo	21
1.	Kata Pengantar	61
2.	Asal Mulo Kerejen Bukit	63

PENDAHULUAN

Naskah *Sejarah Daerah dan Suku Gayo* karya Abdurrahim Daudy ini, mula-mula diterbitkan dalam bentuk stensilan oleh "Dokumentasi L.K.Ara". Jilid pertama terdiri dari 295 bait puisi terbit pada tahun 1971 dan jilid kedua terdiri dari 359 bait puisi terbit pada tahun 1972.

Naskah aslinya sebelum diterbitkan ditemukan dari Saudara Drs. R. Ahmad Banta dan atas bantuan saudara Aman Patriakala saer (sebuah bentuk seni di Gayo) karya Abdurrahim Daudy ini dapat diterbitkan dalam bentuk yang sangat sederhana.

Keberanian menampilkan diri dalam bentuk sangat sederhana itu karena kesadaran akan kemiskinan dan juga kesadaran agar naskah ini supaya tidak hilang.

Abdurrahim Daudy (sering juga disebut Mudekala) adalah seorang ulama di Gayo yang selain menulis saer juga sekaligus dapat *menyaerkan* (mendendangkan) dalam acara-acara tertentu, karena almarhum memang memiliki suara yang merdu.

Selain naskah saer, *Sejarah Daerah dan Suku Gayo*, Abdurrahim Daudy konon masih banyak menulis saer yang bersifat keagamaan. Kini mungkin naskah itu tersimpan pada teman-temannya seangkatan atau pada keluarga dan ahli famili.

Sekiranya naskah-naskah saer itu kelak dapat diketemukan maka akan terkumpul buah pena ulama Abdurrahim Daudy. Dari naskah yang lebih lengkap agaknya akan kita ketahui lebih jauh tentang dunia kepengarangan ulama yang sudah almarhum ini.

Penerbitan *Sejarah Daerah dan Suku Gayo* oleh Proyek Penerbitan Buku Bacaan dan Sastra, Indonesia dan Daerah ini dalam bentuk cetak buku tidak hanya berusaha memelihara kelestarian dan menyebarluaskan saer ini tetapi juga dapat memancing minat pembaca umumnya.

Dan sekiranya ada pula peminat untuk meneliti saer Gayo lebih jauh maka buku ini bisa dijadikan sebagai bahan.

RINGKASAN

(Sejarah Daerah dan Suku Gayo)

Pada jaman dahulu kala ketika dunia ini masih diliputi lautan yang mahaluas, dan daratan masih ditumbuhi tumbuhan jarum, hiduplah di negeri Rum dua bersaudara. Si abang sebagai rakyat jelata, mempunyai tujuh orang putra, sedang adiknya sebagai seorang raja, mempunyai tujuh orang putri.

Pada suatu hari ketujuh putra si abang meminta kepada ayahnya, agar ayahnya membuat kail seorang satu buah. Karena ayahnya begitu sayang kepada anaknya lalu ia mencari beberapa kerat kawat. Tiap potong dibuat dua mata kail. Kini tinggal satu lagi yang tidak punya pasangan. Ketika kawat itu belum dikerat, seorang anaknya bernama Genali secara diam-diam mengambil kawat yang masih lurus tadi.

Dengan cepat ia mencari tali dan mengikat kawat lurus itu, lalu ia pergi ke laut. Setelah Genali pergi barulah orang tuanya sadar bahwa kawatnya hilang satu potong dan anaknya seorang tidak ada lagi.

Pada saat itu Genali sedang mengail dan duduk di atas sepotong batang kayu yang dapat terapung jika air pasang. Seekor ikan segera memakan kailnya. Genali menarik kail, tapi ia sendiri ikut ditarik ikan itu ke tengah dan terus sampai ke tengah lautan luas. Sehingga ia terdampar di sebuah pulau kecil bersama ikan dan perahu kayunya.

Berbulan-bulan ia di situ sendirian sehingga pakaiannya habis dan makanan pun tidak ada lagi. Tiap saat ia memohon pada Yang Maha Kuasa agar ia terlepas dari bencana ini. Sehingga pada suatu hari lewatlah sebuah kapal ke pulau itu. Kapal itu dipanggilnya. Tetapi tidak mau berhenti. Anehnya kapal itu hanya berputar-putar di daerah itu saja. Barulah ketika kapal itu singgah dan me-

nerima pesan dari Genali mereka dapat berlayar dengan lancar kembali.

Lima bulan kemudian kapal itu sampai di negeri Rum. Ikan diserahkan kepada sultan Rum dan pesan Genali meminta ayam jago yang bagus kokoknya dan kain putih empat hasta disampaikan.

Raja Rum menerima pesan Genali dengan baik, dan ikan kiriman lalu dibelah. Di dalamnya terdapat intan berlian.

Permintaan Genali, ayam jago yang bagus kokoknya, putri raja Rumlah yang menebaknya. Sebenarnya dirinyalah yang dipesan Genali, tak dapat ditolak lagi, karena kiriman Genali berupa ikan sudah diterima dan dibelah pula.

Persediaan untuk berangkat dilengkapi : Sebuah kapal, juga hewan ternak, inang pengasuh, orang cerdas pandai, dan bibi putri Terus Mata bernama datu Beru ikut serta.

Setelah selesai mereka pun berangkat. Sebulan kemudian kapal itu sampailah di pulau tempat Genali berada. Yang pertama diserahkan ialah kain putih empat hasta, karena Genali tidak berpakaian.

Beberapa lama kemudian putri Terus Mata dan Genali dinikahkan di pulau itu. Pulau itu sekarang terkenal dengan buntul Linge, dengan rajanya bernama Genali.

Keturunan Raja Genali adalah Joharsyah, Joharsyah dan Merah Abuk. Setelah lama Genali memerintah, pada suatu hari sakit lalu meninggal dunia. Aneh ketika keranda dibuka dan akan dimakamkan, jenazahnya hilang. Rakyat terharu bercampur heran. Kemudian kerajaan diperintah oleh permaisuri.

Tersebutlah raja yang mangkat, sebenarnya jasadnya terbang ke Kutaraja. Di sana Genali juga menikah dan dapat keturunan seorang putra bernama Alisyah. Ketika Alisyah masih kecil Genali pergi ke Gayo dan memerintah di sana.

II

Sekembalinya Genali ke Gayo, Alisyah dipelihara ibunya sampai menanjak besar. Alisyah adalah anak yang pintar. Kalau ada pertandingan bermain selalu menang. Karena itulah teman-teman sepermainan yang bertanding dengan dia menjadi sakit hati. Mereka mengatakan, bahwa Alisyah adalah anak yang tidak mempunyai bapak.

Karena itulah Alisyah tergesa-gesa pulang ke rumah dan menanyakan perihal bapaknya. Ia sangat malu dikatakan anak tak berbapak. Di manakah bapaknya sekarang. Kalau mati di mana kuburnya, dan kalau masih hidup di mana tinggalnya.

Oleh ibunya diterangkan, bahwa bapak Alisyah sekarang berada di Buntul Linge sebagai raja di sana. Jika Alisyah ingin menjumpai bapaknya, ibunya mengizinkan dan sebagai tanda Alisyah dibekali sebuah cincin yang diberikan Genali dahulu.

Alisyah menyusul ayahnya ke Buntul Linge.

Di Buntul Linge ia diterima oleh semua keluarga dengan baik. Terutama ibu yang dijumpainya sangat senang kepadanya. Bahkan mengkhitankan anaknya bertiga sekaligus.

Ketika akan dikhitankan ketiga anak itu dicoba. Siapakah di antara ketiganya yang tepat kelak menjadi raja. Secara bergiliran di atas kepala mereka diletakkan topi kerajaan.

Ternyata di antara ketiganya Alisyahlah yang serasi dengan topi itu. Maka ditetapkanlah, bahwa yang menggantikan Genali kelak ialah Alisyah.

Setelah ditetapkan siapa yang akan menjadi pengganti raja maka khitanan pun dilaksanakan. Salah satu di antara mereka ialah Joharsyah tidak termakan pisau. Karena malu ia lari ke daerah Batak.

Setelah Genali meninggal, Alisyahlah yang memerintah. Dia adalah seorang raja yang arif dan bijaksana. Rakyat bertambah makmur.

Namun demikian, ia teringat kembali ke Kutaraja. Ia ingin kembali.

Alisyah pulang ke Kutaraja dan memerintah di sana, dan sebagai gantinya di Buntul Linge, memerintah Joharsyah.

Tersebutlah di negeri lain, ketika pulau Sumatra telah timbul di permukaan air.

Kisah pertama ialah Raja Johor yang mempunyai dua orang putra, yang sulung bernama Muria dan yang bungsu bernama Sengeda. Ketika keduanya sedang bermain layang-layang datang angin kencang, hingga membawa mereka ke sebuah tempat bernama Serule.

Kisah kedua ialah Muria dan Sengeda ialah anak seorang petani yang disuruh ayahnya mencari itik yang hilang. Harus dicari sampai ketemu. Mereka tidak menemukan itik bahkan mereka terdampar ke Serule. Di sana mereka diterima raja Serule, yang bernama Muiyang Kaya.

Muiyang Kaya menanyakan asal kedua anak itu. Tapi mereka menjawab kami tidak mempunyai orang tua. Raja Serule mereka anggap sebagai orang tuanya.

Raja Serule sangat sayang kepada keduanya dan dipelihara seperti anak sendiri.

Diceritakan pula bahwa dari Buntul Linge raja Joharsyah selalu melihat cahaya dari arah Serule. Karena itu ia ingin mengetahuinya. Ia sendiri berangkat ke Serule dan menanyakan sebabnya. Penyebab cahaya itu ternyata adalah Muria dan Sengeda. Karena itulah raja Linge meminta salah satu di antara keduanya maka ditetapkan untuk raja Linge ialah Muria. Dalam beberapa waktu dia memelihara anak itu sebagai anak raja.

Tetapi ketika raja Joharsyah mendengar kabar daripada ulama dan cerdik pandai bahwa anak itu kelak akan menjadi raja yang besar, maka raja Linge berpikir bahwa anak ini akan menghilangkan keturunan menjadi raja.

Ia berniat akan membunuhnya, yang kemudian dilaksanakannya di Kala Singuk Samarkilang.

Raja Linge juga meminta kepada raja Serule untuk membunuh Sengeda dengan alasan yang sama. Tapi raja Serule tidak mau melaksanakannya, bahkan raja Serule membohongi raja Linge beberapa kali.

Yang pertama ketika raja Serule menunjukkan bahwa kuburan yang sengaja dibuatnya. Ketika digali ternyata bukan Sengeda, tetapi kucing. Tempat itu sekarang bernama *Buntul Kucing*.

Yang kedua ialah ketika raja Serule membunuh seekor beruang ..., yang digantung di atas kayu dibuatnya menyerupai Sengeda. Raja Linge akhirnya tahu juga. Tempat itu sekarang bernama genting Telkah. Tapi dengan peristiwa ini raja Muyang Kaya dapat menginsafkan raja Joharsyah.

Sebagai raja pengganti, Joharsyah lalu bermupakat dengan raja Serule mengirim Upeti (cap usur) ke Kutereje.

Ketika Raja Serule mengantar upeti, Sengeda juga ikut ke Kutaraja. Pada saat raja Joharsyah dan raja Serule menyerahkan upeti, Sengeda menggambar seekor gajah. Gajah itu seolah-olah hidup. Ketika raja Alisyah melihatnya, beliau bertanya, kepada yang hadir. Dan tak seorang pun dapat menjawab. Lalu Sengedalah yang menerangkan bahwa ini adalah gambar seekor gajah putih yang banyak hidup di Samarkilang.

Raja Alisyah berpesan pada upeti yang akan datang, raja Serule dan raja Linge harus membawa gajah putih. Raja Linge sangat marah. Yang dapat menangkap gajah itu hanyalah Sengeda. Kabarnya gajah putih itu adalah penjelmaan roh abangnya Muria.

Gajah putih ditangkap dekat kuburan Muria di Samarkilang. Pada beberapa tempat gajah itu terlepas secara aneh misalnya di Timang Gajah dan di Calung. Dan pada saat membangunkan dari kubangan harus dinyanyikan diiringi tari diberi bedak dan mungkur, sehingga sampai sekarang ada Pengulu Bedak, Pengulu Mungkur serta Pengulu Bujang.

Raja Linge tak dapat menunaikan tugasnya membawa gajah putih di Kutaraja karena hewan itu mengamuk. Gajah mencari Raja Linge dan ingin dibunuhnya. Raja Linge bersembunyi di Krueng Daroi.

Karena itu Raja Alisyah heran, dan bertanya kepada Sengeda, mengapa gajahmu bisa bertindak aneh. Sengeda menjawab bahwa raja Linge berbuat salah membunuh orang yang tidak bersalah.

Raja Alisyah bertindak, raja Linge dipecat: Bawar (tanda kebesaran) diambil diserahkan kepada Sengeda. Sengeda diberi kerajaan di Bukit.

Kabar ini tersebar luas, sampai ke Linge sendiri dan neneknya Datu Beru.

Datu Beru datang ke Banda untuk meminta Bawar, tapi dijawab Raja Alisyah bahwa, bawar itu sudah diberikan kepada yang berhak tidak dapat dikembalikan lagi. Sebagai gantinya dibuat bawar tiruan. Datu Beru kembali, ketika sampai di Tunyang, ia meninggal dunia.

Sengeda memerintah sangat adil. Dia adalah raja yang bijaksana.

JILID SATU

KATA PENDAHULUAN

nume ari hadis nume ari firman
sara kekeberen ini kuceritera
tentang ni benare gere jaminan
sebab gere ku engon terang urum mata

kupenge pelin cerak berawah
tentang ara salah tutur urum kata
kutiro ampun ku Tuhan Allah
buge-buge luah ari bala bencana

male ku seder asal ni daerah
menurut sejarah ari sarak kata
daerah Gayo male kukisah
sebab gere penah i cecerak jema

si gere percaya gere mukunah
gere bersalah urum berdosa
sebab cerakni nume perman Allah
melainkan sejarah wan sara masa

SEJARAH DAERAH DAN SUKU GAYO

1. tekala uren rane remane
asalni Gayo mulo pertama
daerah kiteni lauten ijo
gere ilen mutuho uken urum toa
2. tekala kerpe jarum jemarum
gere ilen malum sara urum roa
ike manusiepe gere ilen murum
gere ilen mepum jenis ni bangsa
3. ara roa jemu inenggeri rum
jemu wa murum sara ine ama
keta si bensu memegang hukum
abange urum rakyat jelata
4. tentang ni taun ne gere ara maklum
gere sahpe mepum kedelen jema
lagi menulis gere ara maklum
ike rakyat umum iwaktu oya
5. kati selese ku ulaki miyen
enti muligen kati terang nyata
engiye si bensu menjadi seltan
keta si abangan rakyat biasa
6. si bensu pitu anakke banan
nguk iperinen bewenne peteri
si tue pitu anakke rawan
menurut bilangan tujuh lelaki
7. anak rawan sipitu jema
mengadep ku ama renyel berperi

renyel bewenne isone berkata
gelah tos ama keik tesaran kami

8. kati beluh kami bergule
udah kadang kase demu rejeki
enti galip kami dabuh berlele
menyenangi ate memejen kami
9. nge beta ama e gere ne munyidik
i tosse kik ari kebet besi
cume wan ate ara mujentik
sekalipun bedebik gere iperduli
10. renyel i mai munango kawat
dabuh ikekerat kawat satni
dalam sara kerat roa kik mehat
mantong pesemet ileni besi
11. jadi mepum me berkerat tulu
kati mujudu so urum ini
sara keratmi gere ilen mujudu
kati mehat pitu keratni besi
12. ujung ralik gere ilen ikerat
melengkan nge lekat sembilang ruwi
nge mari oya baru ikerat
betale niet iwanni ate
13. oya le kik betul si kawe tepat
gere ilen ilipet lagu kik seni
jadi ni amae betale buet
si nge ikersat bubun ku kiri
14. tengah bebuet nise amae
geh anake sibergerel Genali
gere mingah-mingah renyel iyuwet ne
ama e lale renyel i mayi

renyel kubilik i ango e tali
iyuwetne benang gere mukekertek
gere mubebalik kedah temuni

16. nge beluh genal ama e muninget
sahan munuwet ari kiringku ni
minter nge osop ini sara kerat
sahan pamat amat geh ku ini
17. anak si onom nge dabuh gabuk
nta male ibentuk kik oya satni
kusi beluh he die museruk
museluk meluk kadang ku sagi
18. isone selidik dabuh selidik
rupenne kik isangkan genali
isono bewenne berate macik
kusihen kik die imai
19. genali beluh kugeniring ni laut
benang i ikot ter timang lah
kenah ujung ralik sentong cemucut
renyel iikot kusi mutetah
20. i geniring ni laut ara sara atang
ara sara batang kayu murebah
ike waktu geh ayun gelumang
kayu mutetatang nge putetewah
21. i atan atang genali pujejik
i sone munekik tali i luwah
sentan iketir ne nge pujejentik
mata ni kik lekat i awah
22. irasa genali kik e tegang
nge melelingang gere berleluwah

i amatni genali gere wayang-wayang
urum atang atang we renyel ku lah

23. i sangkan iken kulah so nenang
renyel jemerang kulaut berolah
Tuhen pengasih lagi penyayang
genali sayang gere mukekunah
24. selisih beleh urum jarak mara
asal nge beta takdir ni Allah
gelah kite parin genali durhaka
kadang jemawa udah mutuwah
25. kite perin temerke kuatama
oya kati beta ni jema tulah
kite jawab miyen tentang ni oya
nggih osahe ama berbuet payah
26. kebenerni genali kite renyelen
genali musergen kusara pulo
urum atang atang urum iken-iken?
nasib ni ejel teniro
27. pulo e kucak sembilang pingin
nan pe miyen murip kerpe imo
oyale cerak ni jema jahman
tekala uren rane remane
28. tekala kerpe jarum jemarumen
iwan melengkan ni kite gayo
gere ara buntul gere ara uten
ben ne lauten betah kedah mulo
29. menurut cerak sembilang peri
oyale mujadi kin buntul linge
enta kone kase gelah kite kaji
supaya cerakni enti gantung male

30. i sone bermohon bujang genali
ku tuhen ilahi we munero
Allah ya Tuhen ku kune akuni
kune kati kini aku musuro
31. i sone medong berolen ulen
male mangan gere demu kero
sara liyo benang nggih lekat i beden
seluk pakaian kusahen itiro
32. kuasa Allah Tuhen penyayang
gelep urum terang soboh urum iyo
ike ara nyanya ara wa senang
simanang datang sibiloh kiyo
33. Tuhen penyayang munosah rahmat
kujema mularat gere sampe nyanya
geh sara kapal kusone limet
gere oloktu dekat kutempat oya
34. i sone genali mentalu dekat
ara male menat kuperin pora
mpuni kapal gere mera rapat
sana diye alamat urum bela sara
35. leing nge sawah ara terdenger
menalu kapal singah pe pora
ketape tubuhe gere mera derhal
jin seurumel kediyo oya
36. jema si munupang iwanni kapal
nge dabuh munapal macam-macam doa
seba bercerak entahmi renyel
udah di kenyel kite pe beta
37. renyel selalu beluh ni kapal
beluh berlayar wan laut raya

mujening jening nge mureringkel /
nge miyen mukiser kutempat oya

38. ara munopaten pukese kese
renyel kasudahne turah we mera
nge sawah kapal matangku kusone
leing i pange tubuh gere ara
39. i emah tengkupe ini kirimen
ini sara iken kin tene mata
iyosan tengku kase ku sultan
ara si kutenahan miyen keperas
40. kurik putih si sawah tauk ke
urum upuh putih sekedar opat seta
enti kase lani gere i kirimne
sebeb aku se olok wan ni nyanya
41. nge munge terime e oya kirimen
kapal berjalan menurut takat
kire-kire nge ara sebulen
kapal pe miyen ulak kutempat
42. renyel tauki memesan kirimen
beluh kusultan si tinggi pangkat
nan pe isederne sana sitenahan
menurut pesanan singe mepat
43. reje rum menerime kirimen
sembilang iken sara we mehat
i kirim ni jema ari lauten
gere mepat ilen isihen alamat
44. toke pe ulak nge munge i yosan
angkat tangan beserta hormat
terime kasih geh kene sultan
nge demu iken kin jantan pengat

45. ara sekejep mi gule pe i belah
nge dabuh teridah sone reta berat
dum ni le pire simusoah soah
cume harta Allah si ara terdapat
46. emas urum intan nge mure ruah
wan iken sibelah tuke e pedet
sultan mengucap alhamdulillah
kurnia Allah ini nge terdepet
47. delem pede beta sultan tenggersah
kene gere penah ara beta buet
ini mulo hal sana die surah
tentu le udah ara sara alamat
48. italu sultan sagi pendari
perdana menteri simupangkat pangkat
alim ulama si pane mungaji
rakyat rami genap mupakat
49. kati kutalu bewenmu kini
ara si kukunei ara pora berat
ikirimni jema iken kin kami
tentang isi ara reta berat
50. emas urum pirak entan mudoyak
nguk perin sengkak tuke e engkip
jadi aku pe nge dabuh sedak
sebeb nge bengkok nguk perin silip
51. nan pe itehnahne ara miyen tikik
itenah ne kurik kadang kin urip-urip
urum upuh putih oyape tikik
udah male pantik nise kekelip
52. tapi kurik putih si sawah tauke
upuh putih pe opat seta sip
si roa perkara sana die makna e
cube pe bewen ne oya ijelip

53. sagi pendari sisone tungkuk
gere mera mepun nge pukekucip
karena bewenne gere depet maklum
sekalipun murum nge pebening galip
54. kena gere musaut sagi pendari
tuen puteri renyel berkata
karena gere musaut kerah menteri
si pane mungaji kerah nge pana
55. padahal tingir surah ni kaji
oya keta akuni tenah ni jema
entimi penat sagi pendari
gelah berijin mi bebewenni ama
56. kadang nge beta nakuni janji
mulo terjadi masa pudaha
enti ne mubalang enti ne muhali
gelah aku beluh mi tiro doa
57. lagipun iken nge munge i belah
nguk perin serapah buet ni ama
ike singe tasak selo ne matah
ike singe luah selo ne kona
58. enta kone oyape nge takdir Allah
gere ne salah buet ni ama
melengkan akunih beluh we turah
gere makunah kin salah merah
59. kena nge beta kene tuen puteri
sultan negeri gere ne dawa
asal demikian perdana menteri
sagi pendari nge musara kata
60. peteri bercerak dengan selese
keta gerale puteri terus mata
we bercerak kujema dele
lagu men adi muluah ni kata

61. isihen masa aku mucere
urum sudere si dele urum ine ama
taring ko umah taring mi tete
taring mi kite taring istana
62. taring ko langit jenujung ni ulu
taring ko bumingku enti mugempa
taring puserinen rakan sebetku
taring ko bensu pandang ni mata
63. taring ko kulen tempat berketibung
taring ko kampung enti mumara
taring mi alaman taring ko jurung
enti termenung penat bicara
64. si kerna aku nge terucap untung
nge debuh ku ujung kadang nge beta
kadang nasibku tengah iurulung
benne bergantung ku si berkuasa
65. isone deru nge dabu mudemu
mungeti untung peteri terus mata
leingni sebuku wan ni kampung
lagu sitelong denie mugempa
66. denie mubalik lagu mugulung
kasone cernung bewenne jema
lauh si mamur dedemu i iyung
seba nge kemung nge tebok mata
67. reje rum munyedien kapal
barang i kenal kin tuen puteri
sagi pendari mumerah bakal
oja kin pangkal kase i mayi
68. ara soba kurik ara seba itik
nemah nge mutasik dele penedi
batang teguh pe iyemah tikik
seba mugetek kerpe bebesi

69. seba rakyat ate we macik
lagu mubalik irorohe bumi
irasae langit lagu mubalik
ate mujentik muningeti puteri
70. jemu si beluh pe ara mubilang
oya kin pinginang ni tuer peteri
ara si kaul ara si sedang
kati ara musenang i mayi ibi
71. kurik putih gere iemah
sebeb nge mepum surah takbir ni peri
upuh putih imah kin selpah
menurut tenah ni bujang genali
72. kekurik putih gere kite emah
gere ke salah kase kite ni
tuen peteri renyel mubantah
gere le oya tenah oya turah i mayi
73. gelah mi renyelen secara singkat
kapal berangkat ni tuen peteri
beluh kulah so nge pejem darat
lagu gere mepat isien tepi
74. kapal berlayar ara sebulen
nguk iperinen tige puluh hari
kusara tempat kapal musergen
sinting oya kupen tempat ni genali
75. sentan teridah pe sara jeme rawan
gere mupakaian pintu sentabi
upuh putih sentenah ne kupen
mulo ijarah ku si penanti
76. nge mari oya puteri turun
ku atan jumpun karena nggih mubumi
isone le mulo demu penemun
isone awalpun mulo mat jari

77. isone peteri mulo mengucep
sana die sebab abang ku ini
bujang genali renyel mujeweb
nge beta ucep wan surah janji
78. ku kunei miyen kati enti silep
kati enti kemep aku berperi
geralni abang singe mukilep
singe tetap italu jemani
79. genali miyen menjewep cerak
ike mungune ipak gelah kucari
tentang ni geralku ari mulo kucak
si ara mu cerak oya le genali
80. nasib ni bedenku ini musempak
kuwan laut kolak kini mupari
untung nasib gere tertulak
nge beta bang kenak Tuhan Ilahi
81. aku pora ara mukenak
sahan geral ni ipak sederpe pora
gere dalih geral tengah kucak
si patut layak italu jema
82. tentang ni geralku si nge musepak
si mucerak puteri terus mata
enta sana sebab ku ini mutiyak
menurut kenak Tuhan si sara
83. bujang genali berperi terang
entimi bimang ike tentang oya
kati ara gelap karna ara terang
kati ara pematangkarna ara rata
84. hejet maksud nge ara mubayang
male-male terang rupeni mata
ike gere ara aral mulintang
orop munantin remang ketike masa

85. kapal ni peteri bubun kin umah
i sone itetah bebering sana
munaos kenduri kunyit bersempelah
sebeb male nikah jema si roa
86. ari nenggeri rum imah pekakah
tetine itetah itempat oya
ara pitu jema sipegagah
menurut perintah sultan utama
87. jema si pitu menurut titah
oya kin papah peteri terus mata
lagi pun puren kadang munemah
bulang pengkah udah male kona
88. nge ara mulo nge ara mu ingi
male ibuetmi jema si roa
asal nge bertetah tengku kadli
nge cacak kenduri kedah pora-pora
89. hukum i yosah kubujang genali
sah kin suami peteri terus mata
umur lanyut urum mudah rejeki
laki isteri aman sentosa
90. jema ini le mulo menjadi reje
i negeri gayo menjadi kepala
nge ara tanoh tempat ni kute
kenak ni Tuhente menjadi pora-pora
91. ini le mulo asal ni kerejeen linge
kati sudere memahami makna
i jemen kelamin bute kedah mulo
menurut berite dahulu kala
92. asal ni linge arti leing-nge
ara i penge gere berjema
sewaktu kapal mulo i talu e
leing ipenge gere telas ku mata

93. geta le mulo asal usule
enti perin kase orop beta-beta
ara ni cerakni gere le mane
waktu rane remane ijaman puduha
94. kata leing nge iperin linge
kedahni mulo mupinah pora
lagu kite i jaman besilo
padahal linge keta perin lingga
95. kite ulakki miyen reje genali
asal kati enti osop cerite
oya mulo asal tampuk ni nenggar
tentang kerdejen ni daerah gayo
96. bierpun acih puren terjadi
ari kite ni mulo ku so
oya kase puren kase gelah kite cari
supaya enti kase mupelto
97. lengkap perdana urum menteri
kuen urum kiri lengkap panglime
lengkap rakyat sagi pendari
mengatur nenggeri gere gantung male
98. ike kite male mumerah bukti
keta beluhmi kubuntul linge
i erah kuberen rentang muriti
sawah besiloni ara ilen tene
99. anak ni reje ara roa rawan
sara se banan menurut kisah
si sulu bere ini kuterangan
paduke tuen nama johansyah
100. numur due oyape miyen
anak sultan geral jahansyah
numur tige oya anak banan
merah abuk entah bensu mutuah

101. kekeber noyape mulc kuteduhen
kukiser miyen kulain madah
ketape enti kaslu mulo lupen
sebeb kase puren oya mutetah
102. ara sara jema nge mu osop itik
nge ku ujung kuralik we pupeperah
meh kemokotno nge dabuh hek
kusi diye itik nggih ulak kumah
103. beluh berperau nge meh ringkel
nge dabuh mengenal berkejang payah
kusara buntul we beluh renyel
itik kapal isone teridah
104. ituyuh ni uyet serule kayu
baru medemu isone berumah
oleh itik betah payahku
lagu gere berempu ko kuerah
105. singketni peri kerne nge demu
i sergene perau renyel we kunul
isone nise petupang dagu
kerne nge muserbu we urum buntul
106. ari tengahami gere mera mudemu
ini le teku rejeki kaul
nge tekedir Allah ku ini aku
nge dabuh mutuju kujelen bentul
107. gelah mi medong aku isiyen
kadang pe puren isiyen berkubur
sahan mumetehe kenak ni Tuhan
gelah ku taosen bang pora jamur
108. lagipun itik meran isiyen
ini nge sebulen gere timul-timul
ini le mulo asal terjadi en
nge meta puren dabuh masyehur

109. tentang noya pe gelah kite cari
mulo jadi kampung serule
muyang kaya geral ni jemari
we menjadi pemulo reja
110. ara kite penge i cerite jema
urang kaya lanang bejeje
asal keterunen mulo pertama
oya le keta reje cik serule
111. asal ni serule oya serule kayu
mulo mudemu itik munaso
kerna ituyuhe itik mudemu
renyel iatlu kampung serule
112. muyang kaya awal dahulu
we mudemu awal pemulo
pancar ni jemawa ari si pitu
oya kase demu iwanni berite
113. padahal gere ara musemah ulu
gere ara mumangku awal pemulo
wanni cerak ara le mudemu
kedah muserbu lagu si mudawa
114. asal linge serule awal
oya mulo misel cerak sedenge
menurut pikir sembilang akal
asal urum awal oya due serupe
115. kite ulakki miyen seltan genali
urum istri menjadi reje
lues daerah kolakni nenggeri
nge le menjadi linge serule
116. ike i linge seltan genali
i serule terjadi lanang bejeje
gere ne dawa gere ne dawi
memasing rejeki mendapat pulo

117. genap kupe genap mari kupe mari
gelah mulo jadi oya berite
kite sampik miyen seltan genali
sana nge terjadi kuseri peduke
118. seltan genali ara bermanat
iwanni rapat sagi pendari
tekdir aku udah kase wafat
enti mukekarat kasi i mayi
119. udah kase aku osop peninget
ara pedi alamat aku munipi
enta syetan enta melekat
gere le mepat peca ni peri
120. sagi pendari tunduk dan hormat
pumu i angkat sepuluh jejari
sagi pendari ulak kutempat
memberi hormat kukepala nenggeri
121. konot ni peri singket ni kata
nge ara mumasa mubilang taun
seltan genali benger ulu pora
renyel sawah masa kutengku ampun
122. nge meh mulangkum bewenne jema
geh kuistana nge mudeduyun
nge meh geh simunahma nahma
rempat musara rakyat muhimpun
123. seba mongot nge bengkak mata
sahan mi wa ganti ni kejurun
sagi pendari rap putus asa
pede hal nge ara manate silum
124. dangi pendari renyel musapat
isone mupakat kunehmi akal
meh ipikir menurut hemat
seltan terhormat nge sawah ajal

125. manat ni seltan gere ne iyamat
menurut istbat nge meh bekal
benne berperi kata mubulet
betul nge wafat nume ne misal
126. si munguruk jeret beluh berbuet
si edet-edet i umah muringkel
nge meh seniye menurut muslihat
nge beta meit dabuh iyengol
127. rakyat ramai reyel munemah
meit jenazah male i makam
singket ni peri nge la sawah
male i tetah menurut resam
128. senta muke nge gere ara
jenazah minah wallahu alam
kusi beluhe nge meh peperngah
kusihen jenazah diye belayam
129. isone manyabut astagfirullah
kehendak Allah khalikul alam
buet lagu ini asal gere penah
nge meh salah menurut paham
130. kune mi akal urum kekire
melengkan kerne sitanomen
jasad legih tubuhe gere
keta pelin kerne renyel isemenen
131. oyale rerasi jeret terbang
tubuh melayang enta kusihen
perasin ini sampai sekarang
beluh ni panang mubekas ilen
132. beluh mi tengku keta mumanang
ike jeret terbang keta isihen
inegeri linge isone mubayang
iyatang pematang kapit ku uken

133. konetni kata singketni peri
tuen peteri munamat kerejen
dang dang ara mulo pengganti
dang dang munanti kaul anak rawan
134. ketape itulung perdana menteri
sage pendari setie kawan
betul sungguh isone berjanji
maklum le peteri asal jema banan
135. pertama geral kejurun mude
menurut berite munamat sentaran
panglime cik geral kedue
sawah besilo ara keturenen
136. betul penedi jema sedonge
gere moh kite jema jekopen
pora pedi pangkat mukona
bermeh tenege renyel i yamatan
137. enti mulo seltan atawa reje
salangken petue sejep i wakilen
meran we pekara berme tenege
asal pangkat so enti ulaken
138. i seder miyen seltan genali
kenak i lahi Tuhan yang rahmawan
asal si nge mate ulak kemali
nguk terjadi gere muhalangan
139. wan ilmu usul ara musuet
mungkin seujut kata ulama
si gere ara nguk iperbuwet
enggih porpe penat Allah taala
140. betul bueta munyalahi edet
wan ilmu makripet nge terang nyata
kediken Tuhan male berhejet
jema berhejet masuk neraka

141. si karna osope seltan si wafat
kupun minah tempat singgilep mata
ku kutereje isone bertempat
nge kodrat iradat Tuhen si sara
142. gere ilen mugal kutereje
orop beta-beta seje gere munentu
isone seltan dabuh we kerje
istri mude isone berjudu
143. jema we geih ara ari persi
ara ari ceti ara ari hindu
maklum manusia mumerah rezeki
ari luer nenggeri kusone mutuju
144. ara ari portogis ara ari arab
nguk perin lengkap pake jamu
ara si beluh ara si tetap
ulak kuserap tempat dahulu
145. konot ni peri singket ni madah
nge bernikah seltan genali
had urum hinge gere ilen sawah
hamil benemah setabi ni peri
146. ara mukelebihen ibubun ni Allah
memasing ni tuah ni kite hemeni
sabi bersikunen awah ku awah
nge ke die sawah selo diye jadi
147. kegere salah keceh koceh
asal kati perseh nge ke die jadi
betale peri munurut tarikh
oyale kati aceh sawah besiloni
148. kutiro maaf ke kurang lebih
entimi dalih karna cerak ini
semayang abang gemasih utih
si ara kubetih oya kucari

149. gere ne naru peri kujalin
peteri bersalin tekdir ni Allah
galak ni seltan gere ne terperin
asal makin galak mutamah
150. seltan genali renyel mungenal
iperah geral ibubuh alisyah
bedene sehat tubuhe setal
sipete nakal ara teridah
151. serlo roa lo we mutamah kaul
nguk nge kunul berlangkah sentat
karna bercerak gere ilen betul
mantong muraul gere ilen tepat
152. tengah lagu ini seltan genali
kuatas isteri we renyel bermanat
ike gere ara muhali seli
kadang akuni udah berangkat
153. kena nge mokot kutaringeh nenggeri
gelah ku entong mi mulo tempat
kadang nge sana nge ara terjadi
selama ikudukuni kune nge rakyat
154. ijege jeroh kase winni
enti osah dagi cabak munamat
kemakin remalan kase porami
oya kuso kini gere mepat-mepat
155. ini kase sensim seloken kujari
kupumu ni winni oya kin alamat
kadang kase lemam aku ulak kuini
kadang kase winni purem muninget
156. renyel musut tuen peteri
renyel we berperi dengan hormat
selamat seltan selamat kami
enti muhali seli kutiro berkat

157. teir kase seltan ulak kuini
kadang kase uwinni mukale muninget
anak rawan payahdi ijegei
suketan akuni enti ara buet
158. oya nggih mukunah kene seltan
anak rawan betale turah
enta kune perasate gelah itantan
enti sampe idatenen gere bererah
15. seltan genali renyel berkemas
ter lo sitemas munangkap langkah
muningeti uwin atewe uwes
lagu melemas munengon alisyah
160. tentang ni langkah turah wa lepas
lagi meh berkemas isone nemah
munarung uten urum rime tamas
urum belang lues kati baru sawah
161. berbulen bulen kati sawah kulinge
isone gerle meh anak buah
enta arisihen geh ni reje
nge raya bahgie nge besar tuah
162. puteri terus mata lagu nge mugile
beta we juge anak johansyah
merah mabuk mongot muderu
nge pe aduh-aduh anak johansyah
163. benne rakyat sone muderu
lagu gere mudemu ne seltan mutuah
ibi ni seltan si datu beru
dabuh bersebuku nge mu arah-arrah
164. seltan genali berperi terang
kati muterbang aku dengan serapah
tentang beluhku mu amang-amang
enggih telas ipanang enggih telas i arah

165. dele pedi geh jema beranto
kuujung ni pulo lagu mujajah
ari luer negeri gere ne tertuho
oyale mulo si ku pepatah
166. ku seltan genali ulak kerejen
isone le miyen we mumerintah
sagi pendari simunamat sentaran
renyel munulakan si nge terjurah
167. nge ulak belo miyen kurudang .
nge ulak pinang miyen kutampuk
benang gasut nge ulak kuelang
nge ulak mayang miyen kupucuk
168. nge berseseren kudaling kolak
kutelege pirak miyen munebuk
ike si pait nge ulak kulemak
ike si porak nge ulak kusejuk
169. ate si karu gere ne macik
sembilang rintik munyirem taruk
anak buah enggih rusak rasik
enggih ne mugertik urum mugertuk
170. gere ne mudenguk kurik urum itik
gere ne musarik urum mutaok
rakyat tetap gere ne usik
seltan si cerdik minamat tampuk
171. sana die keber anak ni seltan
singe taringen sitengah munusuh
gere ke diye ara sesanahan
kena urum seltan mokot gere demu
172. gelah miyen kucari pora
selamat sentosah enggih benger ulu
nguk bedediyang urum anak ni jema
kin tene e ara biyak kin ulu

173. ara bergasing ara berpedang
mejen bersabung macam-macam lagu
ketape we gere mera sombong
kin pong-pong sahan mudemu
174. kin rakanne nggih mera ukang
sabe we menang gih mera talu
bier berkenek bier bersimang
nguk sembarang we si mujur
175. ari kena gati e we pubeta beta
beluh gere ne mera jema berjalu
belu iperin biyak gere ber ama
ike urum oya sahan mera beradu
176. betale peri sesabi kekanak
betale cerak mesisu sisu
si ulak nge kona porak
beluh isurak kati enti laku
177. ari kemele ulak kenyel kumah
sentan sawah we renyel bertanya
ijeweb ine e dengan karna Allah
nume kase berakah aku berkata
178. iperin jema aku enta sanah
anak haram jadah si gere berama
beluh ni ine e ibubun berakah
kadang betul udah lagu peri ne jema
179. ipumu nine e munamat lopah
sire we mulupah mulayang sesanah
irebut ni anake oyah sine lopah
asal gelah sawah kenaku masa
180. i amat nine e gere ne muleluah
takut we mukunah udah binasa
ipengen ko uwin dengan karna Allah
geral alisyah sa mububuhe keta

181. olok di denem bang ko kin amamu
beluh mi anakku ku nenggeri gayo
inile sensim itaring namu
beluh mi ku tuju kunegeri linge
182. selukne sensim pas ku kujejadi
i sone geral ni genali mutulis tene
i sone amamu kin tampuk nenggeri
asal ni kerejeen ni oya pemulo
183. nume le ko anak sanah
anak ni reje megah bangsa si reje
ierah geralmu mumake alisyah
isi kin penah ara ipengeko
184. beluh mi anakku dengan selamat
gelah kase inget enti palolo
kati kuperin besilo amanat
sebeb gere dekat enggih sawah serlo
185. munarung uten munangkok baur
mungilih arul mungarung pulo
mulipe weis selintang bujur
muniti buntul kati sawah baro
186. terbilang jeroh munangkap langkah
nge cacak selpah lagu beranto
teremang ketike uwet ari umah
owin alisyah langkah pemulo
187. beluh pun ne iyemah he kin kawan
penunjuk jelen masa besilo
keluer belang masuk ke uten
nge berulen-ulen sawah ku linge
188. ipaluhni kampung dabuh we teduh
sebeb kerna kemuh porak lao
iluwahne baju iparinne upuh
renyel we beluh kuwan telege

189. tengah muniri mengusuk beden
geh sara beden kone minyino
ierahe berenem sara jema rawan
olok pedi horan munerah buwete
190. nge beta ulak bacar-bacar
renyel berunger ku abang si tue
erah abang pe telege so tekal
jema sekakar bang kuwassa mayo
191. renyel abang beluh munerah
renyel beluh serapah menentong telege
depet menengon sentan we sawah
isone johansyah male mudere
192. ari sihen ge kuini
kati muniri kuwan telege
meh kedelem jema gere berani
ari pudah mi pucecelo
193. renyel alisyah menjeweb peri
kati muniri aku kuwan telege
karna bedenku kemuh penadi
lagi enggih berpari isiyen time
194. lagipe len gere ara
aya kati beta gere kuseje
nume kena jeis kena kurang mata
asal tura beta kegere kune
195. kati gere ara time iparin
asal nume penirin sahan ni heme
nume ini kulem atawa nein
nume penirin nuwin itos beseje
196. isone dewe nge dabuh kang king
urum-urum giging ini urum so
karena roanne urum-urum ubing
isone mutaning male pelolo

197. isone male bersesentaten
ike jema jahman bermuhun mulo
masing-masing mulo bersuweten
iperin keturenen nama urum ine
198. ini minsel mulo kuperin
berkat ni awan datu muyang kute
ike sinting aku keturenen polan
gelah nguk kulewen ini manusic
199. win johansyah mulo berperi
musuwet genali paduke reje
win alisyah renyel mucari
munyebut genali seri paduke
200. isone roanne urum-urum berongot
urum musuwe geral ni ama ku
geral genali musara sebut
boh gere ne musaut sepatah kata
201. isone johansyah ulak miyen surut
dabuh we mesot kumah musangka
renyel iseder kuseltan urum cut
aku nge terkejut sine nge pora
202. Si kuwan telege so jema muniri
ara muperi kerah geral ni ama
oya kati ulak aku kuini
jema ari si kin kinen oya
203. renyel seltan mujeweb peri
kadang enta ber ngi ko ku jema oya
beluh i talu ko mulo kuini
beluh irai gelah bacar pora
204. nge beta johansyah renyel miyen ulak
renyel owe bercerak kujema oya
entah kite kumah urum-urum segerak
ara male kenak tikik bicara

205. renyel roanne ulak ku umah
sentan owe sawah renyel kona sapa
ari sihen ko geh gere penah kuerah
sana iperah sampa beta
206. isone alisyah renyel mujeweb
karna ara le sebab ara le mukerna
ke beden tubuhku nge beta terucep
olok pedi hejep mumerahi ama
207. keber re amangku menjadi seltan
munamat kerejen we berkuasa
itaring ne aku belem remalan
teniron ni beden kadang nge beta
208. iseluk ni ine sensim kujejaringku
kadang kase demu aku urum ara
oya kin tene kadang muserbu
kati enti ragu masalah sangka
209. mulo aku uwet ku mah punku
kedah pun ku lakun ni amawa
we mubetih rupe ni amangku
bering isihen demu gere ne dawa
210. musaut miyen seltan genali
cube pe irai kini pun ma
kin sana itringsong pong diri
imayi kini gere nguk beta
211. isone alisyah miyen berperi
kati kuini besilo aku sawah
sebeb serengku ilen aku muniri
si kerna aku ni si nge masuk bersalah
212. nge betape pun ne renyel irai
ara sekejep mi renyel teridah
isone mudemu seltan genali
iylek ne alisyah gere berleluah

213. isone mongot se urum ini
kerna buah hati nume ne cogah
belo renyel musumut kutuen peteri
musamut segermi win joharsyah
214. isone mongot nge dabuh rami
jema kuwen kiri kone musowah
isone mungune sabi diri
sana kin ini nge ara mukunah
215. nge demu langit kedah urum bumi
nge demu tepi kedah urum bilah
dedingin sejuk urum celala bengi
nge murah rejeki urum besar tuah
216. kerna nge mubetih anak nenggeri
iaran kenduri beta mulo kedah
isone murum segi pendari
isone itawari uwin alisyah
217. bebewenni jema nge meh mubetih
kin uwin utih win alisyah
ate ni peteri olok dikasih
nguk perin lebih ari johansyah
218. nume kerna aliten nume kerna kenyeh
nume kerna lebih atwa kuyah
nume kerna jarak geh ari acih
kadang nge terbetih jema mutuwah
219. sifet ni alisyah nguk iperenen
urum rakan-rakan murah pedih ramah
gere penah mudawa urum kawan-kawan
mayi jema mangan male jepjep uma
220. sara sipetmi siara mutuho
mengawali koro olok pedi kenah
ku buet lein kurang beriro
meningeti kero bercampur kuwah

221. ulak miyen cerak seltan genali
munamat nenggeri we berkuasa
anak buah memakin rami
anak buah nenggeri aman sentosa
222. isone seltan ara berniet
seltan berhejet munos istana
gelahbang lues itaos tempat
memejen musapat menteri perdana
223. iyango kayu ari serule
iemah kulinge itegu jema
benne rakyat teguh setiye
kin umah nireje secara rela
224. itaos uma ara pitu ruang
opat sagi senang pemanang mata
ketape rakyat gere nguk sembarang
mutimang pasang urum umah oya
225. oya kati ara wan melengkan
mulo ari jaman cecari jema
adat urum adat iwan pengerjen
memejen isuweten wan samu sapa
226. ike ilangit ara bintang tujuh
ike ituyuh kal pitu mata
sikerna umah sipitu ruang
keta penulang pitu perkara
227. oya le mulo asal ni umah
wan daerah pemulo e ara
sebelum oya asal gere penah
ara le itetah orop pora pora
228. miyenni seltan ara muninget
utang si opat gere ilen luah
ike gerald ni anakni nge mepat
ketape sunet gere ilen penah

229. renyel mukumul sigaip dekat
isone berpakat renyel ipeteta
nge munge leing kat mubulet
tentang nisunet urum-urum ipapah
230. miyen mulaing peduke seltan
munget kin beden olok di lemah
lagu gere ne lepas munamat kerejen
lagu si taluk iyeden peninget nge juah
231. itetah kenduri italu mudim
italu jema malim membaca patihah
tengku guru renyel munyeluk sensim
edet silazim mungkur ilapah
232. sebelum igelut mulo ibueten
kite iyerah miyen sahan simutuah
sahan si nguk munamat kerejeen
oya pe miyen turah iyerah
233. bulang kerejen ibubun ku ulu
ku anak si tulu ipinah pinah
sahan mutuah oya mudemu
oya kin ulu turah ipapah
234. ku uluni johan ibubun mahkota
mugeleng pora gere teremah
ku uluni johar oya pe beta
melengk pora rongok mutewah
235. miyen ibubun ku uluni ali
sentan mupari gere ubah ubah
gere musingkih kukuwen kiri
tepat penadi nge timanglah
236. nge mari oya baru ichatan
mulo imenjelesen wein alisyah
nge munge oya imenjelesen miyen
renyel mujelisen win joharsyah

237. dekat pamarin renyel isuneten
rap permehen win johansyah
nguk niseni gere mera ipasangan
nguk kekemelen mudim munetah
238. iganti mudim miyem maripet
bermeh istbat berganti lopah
sekalipun beta nge dabuh muyet
karna kulit liet nise ilapah
239. tengku mudim nge dabuh penat
jema idarat nge pe alah-alah
akhire teduh oyane buet
gere jadi ikerat win johansyah
240. kesile isone penge ara mubayang
sahan si nenang sahan si kalah
pemulo awal munyeluk bulang
tengah we tepang tulu berpapah
241. rasai ku ali we jatuh seltan
tapi gere ilen ku we muserah
sebeb ama e tengah murip ilen
tentu le puren ku we mujurah
242. ara due taun mi lebih urum kurang
munurut bilang ke gere salah
oya mokote waktu berselang
masa museram ari munerah tuah
243. nge tekdir Allah Tuhen berkenak
seltan pe ulak kurahmatullah
had urum hinge gere tergak
asal gere tertulak ike masa sawah
244. ke munurut edet kedah baju ding
ku alisyah mutaling kin pemerintah
edet lagu ini nge mutaling maling
nge mubatang ceding idet daerah

245. taklik pintu rime i ruang eling
ke menurut leing singe musabaqah
betale edet singe mujeling
besiloni nge taring kedah nge luah
246. keta besilo gelah kušeder
kin joharsyah bawar singe mutuju
keta kin alisyah oya kulah kamar
ke menurut benyer singe mutentu
247. kin joharsyah tumak mujangut
nge beta menurut bulang ku ulu
kena bulang kerejen gere tersamut
waktu mulo sunet iyerahan kuguru
248. besilo alisyah menjadi seltan
menamat kerejen we kin ulu
gere we jengkat kin peserinen
biyer kin anan tok datu beru
249. kemakin kin ine e olok pedi hormat
ke baring sana buet ine e italu
gere we mera mulangkah mertebet
muninget kin menat ni muyang datu
250. sagi pendari nguk perin kuet
papah mubulet kuseltan baru
lagi jema tue kaum ni edet
selput singket isemet naru
251. benne jeme olok di hormat
nge beta mertebet bang jema kin ulu
oya le tempat nisuket sipet
kelebih iyuwet silemah ibantu
252. nge mubilang taun kerejen iamat
seltan meninget kin asal dahulu
sagi pendari italu e rapat
si kerna niyet nge ara mutentu

253. lagipun seltan cukup ibarat
selatan mininet kin buet te lalu
tengah we kucak mera putetemet
munerah tebiet koro munusu
254. buet ni seltan asa tengah kucak
olok pedi galak mungawali koro
ara koro ara koro sawak
ara seba sampak oya si biyo
255. tebiet ni koro we munyimak
ike geih anak ni koro lein so
renyel icangkil ne nge pe owak-owak
mejen mulangak sampe musoro
256. oyale ibarat kite insen
pemikirni setan oyale conto
kaul ni ate ni ini gere terungeren
udah kase puren timul bang cino
257. oya kati seltan munaran rapat
sekalian rakyat kone munyino
dabuh renyel seltan munyeder hejet
kati ara rapat kuaran besilo
258. kati kutalu segi pendari
ara pora peri maaf kutiro
aku sisiyen nge le mulo jadi
gelah bang minah mi aku kuujung pulo
259. sikerna isiyen munamat nenggeri
nguk perin ganti kuparin besilo
abang joharsyah isiyen terdiri
kin khalipah nenggeri enti ara kaco
260. kusagi pendari kuperin tikik
kelemen beramik pantas berulo
anak nenggeri enti ara usik
enti kase mukertek urum reje baro

261. i imenen aku isiyen pepantik
isiyen pejejik beta kedah mulo
kuharap pengulu urum reje cik
enti osah muretik ibarat kero
262. iwas teger ideret lemik
gere jen mudedek renyel irede
ike sabi diri murah mujentik
murahdi musonek kin jelen pelolo
263. sagi pendari munyamut perkataan
ike manat ni seltan kami jamuri
kami tiro tulung mudah mudahan
kami tasonen kujantung hati
264. kadang nge beta tekdir ni Tuhen
keturahe seltan minah nenggeri
enta kune oyape gere tertahan
gelah kami julen bersagi pendari
265. sikerna rape menatni seltan
joharsyah miyen ibubun kin ganti
gere kukiri gere kukuwen
ke turuh i seltan keta papah i kami
266. nge resam deniye kin peraturen
asal jema berpeserinen abang urum engi
nge kami terime sepenuh بدن
ini kutantangen sepuluh jejari
267. mulak riwayat ine ni seltan
tentang keedeem ni tuen peteri
nge piyen lo gere bermangan
seltan mukeber seltan minah nenggeri
268. nge kurus kering nge taring tulen
nguk iperinen gere ne berusi
kati cerakne kuarap ni seltan
ike itaringen kune kase akuni

269. enti mi ine kase mongot mongot
udah gere mokot aku ulak kini
kuabang johar pe cerak ku mikot
enti ke kire munamat nenggeri
270. mucerak pora miyen ku joharsyah
nge masalah silah masing-masing jelen
pertama iyengon nise ku rempah
asal gere teremah nise bukang kerejen
271. kedue we gere ipangan lopah
waktu we berpapah male mujelisen
ari kemelle itiro e minah
beluh majah majah baring kusihen
272. gere ne teramatan tentang ni langkah
beluh we turah terserah ku Tuhen
tumak mujanguk nise i emah
sebeb oya terjurah masa ichatan
273. tentang ni kemelle lagu gere teremah
ke gere tetah-tetah udah masuk kenyyayan
perasan ne diriye anak kekuah
gere iyedong tuah gelah kukunehen
274. menurut peri sembilang cerak
kunenggeri batak we beluh remalan
isone johansyah dong mutlak
gere penah ulak seumur beden
275. waktu oya nume ilen batak
gere ilen mucerak geralni jajahan
bujang johansyah kone mujejak
menetapni tapak tempatni kediemen
276. oya bang hasil mendepet tumak
Tuhen berkenak gere termepatan
mulo e kemel pamarin ne galak
sekalipun jarak langkah ni johan

277. oyale si mucerak sibayak linge
i batak karo mulo ni kerejeen
tentang noyapei teduhen mulo
ulak berite minah ni seltan
278. asal kati beluh sagi pedari
menurut pere ara roa rupe
yang pertama kena munentong nenggeri
yang kedue lagi munos kute
279. tempat bersemayam ni seltan ali
seltan aseli reje pemulo
oyale sebeb kati irasi
sawah besilo ni kute nireje
280. nanpe iperinen masyhur i acih
oya mubatang tebeh awal pemulo
ike cerak paluhpe ara kite betih
ike jak u acih oya kuterje
281. kerna nge munge umah ni seltan
ulak le miyen pendari reje
ari acih so kembali miyen
beremalan uten sawah ku linge
282. reje joharsyah munamat kerejen
tempat kedudukan inenggerilinge
nguk le iperen oyape aman
ke menat ni seltan gere le siye siye
283. murah rejeki lanjutni umur
pemerintahen teratur gere mucenenge
ketape ku acih so jule cap usur
kone mukamul linge serule
284. ini kuterangen sagi pendari
simucerak sabi ari awal mulo
ike gere salah si ara terperi
ini kucari menurut berite

285. pertame serule kedue penarun
sisara penangun urum reje linge
ketige lumut keempat rema
oya le keta ibelangkejeren gayo
286. kelime lane penghulu nawar
keenam renyel oya delung linge
ketujuh bukit ibelangkejeren
kelapan iperin oya urum gele
287. sikerna wa arape siyah utama
nguk perin ulama ni reje linge
siyah utama gere mujajahan
baring kusihen tempat te senye
288. beru merah abuk dengan ni seltan
we iyangkapan urum sara pemude
ike gere salah urum banta ali
renyel ku serbe jadi munuke deniye
289. inile begeral silapan johar
geh musehur ari sedenge
ike kurang lebih aku bertutur
ketah semah sungkur aku kusudere
290. orop ini mulo kuteduhen kisah
ike ara salah maaf kutiro
jejari sepuluh pumu due belah
malum le delah gere berbelide
291. gelah jejer-jejer enti sakit makit
kerjen bukit male ku rike
gere male kuputer gere male ku uwit
gere male kulilit urum kuliye

Tamat

Baleatu Takingen, 8 Safar 1379
13 Agustus 1959

JILID DUA

KATA PENGANTAR

Alhamdulillah sekaliyen puji
Tuhenku rabbi selebih kuasa
selamat salam kuatas nabi
kuatas pemili si imen percaya

kehendak Allah rabubul izazati
nguk le menjadi sigere penah ara
kerejen bukit male kucari
mulo e jadi i jahman pudaha

gerak wan ate turun kujejari
muloi bertari mata ni pena
i kertas putih madah irawi
kati nguk ikaji urum ibaca

timul bang upet kase urum caci.
kadang kekeberni gere kin kona
malum sudere kuatas akuni
nguk kukaji gere mepun makna

kire jema tue sipatut mucari
sipane munyahi siwayat lama
ini akuni orop ipeperi
kenak munapi nge pelih ampa

kerna sana aku kati berani
mustahil keteni nggih musarah kata
lagi si mupancar timul ari bumi
ari pudahami nggih cecerak jema

baring sana buet turah muasali
ari si keta gayo ni kati nge ara
ike tentang ku Tuhen sahan berbakti
keta we suci ku Allah taala

ara seba jema we kemel penadi
gere nguk ipeperi geral ni ama
keta kerah waktu kenduri
ara muperi waktu wan doa

wah ni tingkem ipangan perling
wah ni aging ipangan cencimpala
kuseder kisah menurut leing
nge mutaling temaling ari jahman pudaha

sibacar lepas silemem taring
nume takar baning aku berkata
kesilep aku ara si munyaring
weis setenting kin tawar ni mata

selamat sudere enti ulu pening
ike wiis mujening gelah manut kutowa
ara suderengku sipane munenting
enti osah muputing wan jantung rasa

baring sekidah limus ni gading
asal turah we taring cerahe pora
baring sekidah rubuni ceding
sekalipun we kering kurang murasa

kuatas diringku miyen ku banding
nge sungguh sinting bilang cerak oja
dub jema jahman gere penah muleing
apalagi kekuting ikuduk ni jema

ASAL MULO KEREJEN BUKIT

Alhamdulillah mulo kurike
ijaman sedenge sara ceritera
daerah gayo nge siyep sediyé
nge lengkap seniye pulo sumatera

inenggeri *johor* roa manusie
we sara ine urum sara ama
bergeral *meriya si ulu bere*
keta silamur dua bergeral *sengeda*

oya rowanne *anak ni rejo*
geh pemulo ari *malaya*
iradat Tuhan gere terhinge
asal ara-ara seje gere i sangka

geh rowanne gere la beseje
ku nenggeri serule kumuyang kaya
gelah kuseder pengen sudere
nge ejel teniro jema si roa

menurut tarikh we berlelayang
ngi urum abang muloe keta
isone rowanne lale berdediang
isone bersenang berlelayang puda

nge tibe-tibe rowanne mulayang
dabuh muterbang we kuangkasa
kuyu keras bade mutayang
meminter munyerang selat malaka

iyamatne tali gere mulelekan
iyamatne benag berkecep mata
munaik kuatas nguk perin nenang
gere ne mubayang telas kumata

sara riwayatmi betul berlelayang
wan sara belang lagipun rata
isone lale we berdediyang
engi urum abang meriya sengede

we rerowane anak ni jema megah
anak ni khalipah inenggeri oya
menjegei itik we iperintah
nge sigere Allah kujema oya

lale berlelayang tali iluah
itik mujamah wan laut raya
meriya sengeda atewe gunah
ulak kumah berunger kuama

renyel amae mungin ni perah
enti ulak kumah ike gere ara
beluh berperau nge mojah ojah
nge sawah ku lah gere mepat denie

ama ine e sitaring iyumah
ara mubantah kedahne pora
nge gelappe lo gere ilen sawah
iperinpe alah nge osop ari mata

jema ini rowanne menurut berite
jatuh kuserule kumuyang kaya
kupen ne sawah tengah malam bute
nge terang lo teridah jema oya

bedenne rumpul nge kona ledak
nge meh lutak jema si roa
kuparikni mersah renyel rowanne mutiyak
nge meh cemak segele anggota

bewenne jema nge meh gerle
ari sihen manusi kati nge ara
muyang kaya tenyel mungune
ari sihen kin diye win win si roa

sahan pemili sahan saudere
sahan keluerge urum ine ama
isihen kampung isihen deniye
seder uwin mulo gelah terang nyata

jema siroa menjeweb kune
kami gere berine urum berama
kati sawah kami dengan tibe-tibe
melengkan reje kin ine ama

gere mukampung nggih mudeniye
gere musaudere kaum nggih ara
kati kuini kami muserbe

isone miyeh daun mungune
reje cik serule muyang kaya
tentang ni geralmu sahan kin oya
oya padih cube iperinko pora

kekanak si roa menjeweb kune
akule si tue bergeral muriya
geral ni win ni silamur due
kuseder besilo oyale sengede

reje cik serule mumayi kumah
upuhe isesah bedenne inerin
kadang jemani udah mutuah
kati nge sawah rerowan nuwin

kati geh kuini nge tekedir Allah
reje ki berosah singuk kuperin
aku mengucep alhamdulillah
penosahni Allah kuperin amiin

kuperin tikik kuulaki kisah
kati enti tenggersah kaum hadirin
sikerna lelayang kuwini menemah
enta sanah sanah kadang iperin

ike tantang oja entimi mubantah
ketape nge sawah rerowan nuwin
riwayat oja nguk kite ubah
nguk kite pinah kubarang lein

kujelen udara lelayang menjurah
gere mukunah kadang itiyup angin
ke jelen laut pe perau munemah
oja gere salah keta kite perin

setuju rowanne nge kone sawah
betale kisah sah dan yakin
kulain jalan pe gere mukunah
enti kase mutingkah itaus jalin

kati enti gasut jalan ni madah
enti kin ulu ni awah oya-oya pelin
ketape lelayang si ara megah
ike benar salah gere ku jamin

wa orope miyen muriya sengeda
urum mujang kaya ibubun kin anak
reje cik serule simumerala
asal muyang kaya atawe galak

gemasih olok kin anak si roa
dua e ari mata kite enti jarak
lagu silengkap ke gere pe ara
gere dalih muharta mas urum pirak

jeroh ididik jeroh itapta
kin akan si roa perala e cacak
lagipun anak ni tuahe ara
dele pedi jema si ara mukenak

berperi jeroh manis berkata
asal rupe pe ara nguk perin *rancah*
gere penah metus ate ni jema
baring sana sengkiren bercerak

fiil perange kuperin pora
asal gere mera biyak tukang lagak
meh kemokotne masyhur nahma
meh ibetih jema kaul dan kucak

ara mejen muninget we kin ine ama
lauh ari mata mejen muserlak
meninget kin nasib nge sampe beta
urum ine ama olok pedi jarak

ara meninget kin kampung halaman
nge tekdir ni Tuhen ge terulak
lagu si mubayang belang pediyangan
urum-urum rakan sabi kekanak

nge beta nasib gere terungeren
nge musiding uten urum laut kolak
nge memasing teniro ni beden
gere ne kusuweten ujut kase musempak

kekanak si roa ngak perin mutuah
nyala munsyerlah kuat muserlak
reje linge sabi menerah
reje joharsyah kekire sedak

sentan iyo lo dabuh munsyerlah
ijanga e erah lagu si jarak
ari pudaha mi gere penah teridah
isone peperngah kuat munangak

ari neggeri linge nguk perin wamah
cahaya e i erah isone mupantak
nge menta reje munangkap langkah
turun ari umah sedije cacak

tuju langkahe kukampung serule
isone mungune reje bercerak
muyang kaya italu beseje
karena we reje empuni mustahak

kati sawah aku besilo
ara tikik bike ara pora kenak
sikarena wa arape sentan iyo lo
siyen merike cahya mupelak pelak

caya ni sana isiyen mubawat
kite perin kilet lagu gere layak
oyale sebabku kati mulimet
kutanringen buet sitengah muhayak

caya kuatas lagu mubalat
sana diye alamat sana diye gerak
olok aku tekok olok akupipet
ari selama kuinget ari mulo kucak

reje cik serule menjeweb kata
karena nge beta kene kejurun
ike tentang noya gere penah ara
kadang salah mata bang tengku ampun

bit pe bese dalam pun beta
benne jema-jema tjube kite talun
kadang ara menerah siterang mata
oyape keta gelah itujun

menurut pemetihku gere le ara
ike tentang ni caya aku nge sumpun
asal gere penah/icecerak jema
se mokot lama nge piyen tun

asal sibenare ni muyang kaya
tentang ni caya nggih penah iyengon
demiken bese rakyat jelata
ke tentangni caya kurang kin iron

musaut miyen reje joharsayh
udah i umah ara tason
idahe ara le jema mutuah
si nguk munemah pangkat kejurun

muyang kaya mujeweb madah
ke jema mutuah mulo kene ampun
ara roa jema kuini sawah
nge tekedir Allah kini mususun

nge beta reje renyel berperi
gelah berbagi bang kite jemawa
gelah sara taring sara kumai
ke gere engi gelah abange keta

reje cik serule gere mudewei
renyel ibagi nise sara jema
abang si ulu bere renyel imayi
taring si engi bergeral sengeda

konotni cerak singketni peri
isone berjanji reje muyang kaya
sikerna reje sama kubagi
gelah jeroh peralai enti kase mujana

reje linge renyel miyen berperi
selo kin berani jema muinaja
lagipun anakni jema sibahgie
tentu kite rugi gere berperala

nge munge urusen renyel matjari
so urum ini nge mutali doa
munyeren uwinna suker penadi
abang urum engi jema si roa

kune melekangne kulit urum usi
ibelah jejeri olok pedi nyanya
isone mongot abang urum engi
jema kuwen kiri nge dabuh gerola

renyel iyanuh urun itetoki
ibubuh peri mameh lagoina
luh si mamur mujaril kupipi
sajang penadi uwin muriya

meh kemokotne turah wa jadi
nge taring engi win sengeda
asal nasippe nge lagu ini
nge kenak ilahi turahe wa beta

cerak naru gere ne kucari
derasan kuate kujantung rasa
reje linge oya kepala menggeri
renyel imayi win muriya

sawah kulinge nge dong seringe
sinting terjadi muncerlah cahya
ari serule terus penadi
jema si rami munerah nyata

ke ari linge gere sicari
ari tengahami asal munerah beta
menurut leing sembilang peri
ari sone ari ini urum-urum ara

benar mutuah jema si roa
nume ne tetaki urum sak sangka
sebeb nge teridah nyata mubukti
nge cukup uji muriye sengede

pede sara waktu reje munalu
asal tengku-tengku alim ulama
sikerna reje ara pora ragu
oya kati italu guru pendeta

geh kene reje kutengku tengku
kati kotalu tengku ulama
ara le tikik male pengunenku
gelah kase tentu surah ni kata

sikerna muriya nge mokot urum aku
memakin naru kaul ni anggota
sawah ku kaul le renyel kumutentu
gere mungaru munoa jelata

sementara besilo kerah jeroh lagu
beta keselalu setiap masa
gere ke ara kase muka'a ka'u
oya pengunenku ijewab pe pora

alim ulama simegah megah
peri iluah dengan segele hormat
ike anak ini betul mutuwah
ketape udah kerejen melekat

pendepet ni kami ike gere salah
ampun joharsyah udah kubarat
delem pede beta kureje terserah
kulaing ni rampak betale tepat

reje linge dabuh tenggersah
nge berengkat kesah kekire pedet
kediken kerejenni kase mupinah
oya meh kin sampah ahli si dekat

kase kona bang leing ni pepatah
jema mumerah koro bertemet
jema lein bang mangan kuwah
siberkejang payah nge gere depet

jelen lein gere ne teridah
gelah bang ku emah besilo pakat
kegere tir besilo pakat
ujud kase luah bang ini pangkat

kecik serule beluh serapah
sebeb nge gunah lagu gere sempet
kumuyang kaya kedah nge sawah
osahe perintah kata amanat

anak anakni jema betul mutuah
nge iyerah kurampah ulama musapat
ini kerejen ike gere tetah
enti kase salah we munamat

muyang kaya kereje berserah
gere le teridah kuaku cacat
enta melengkan reje sipane munetah
keta oyape papah gelah sara pakat

reje linge munosah pertimangan
lein ari *iyunuhen* enti naru kaji
ike sampe kaul kase langso puren
nge luwah kerejen kuwe muganti

enti kase reje ara segen segen
oya imenen kin tuker ganti
golah kase imayi beluh remalan
kuwani uten kedah itetahi

sawah kusone renyel ibueten
renyel iyunuhen enti ipeperi
naku pe i linge turah kurenтелен
baring kune jelen turah mujadi

muyang kaya musnaut miyen
lein pertimangan gere ke terciari
ikin ni beluh atawa *iyusiren*
enti bang iyunuhen sayang penadi

reje linge munosah keputusan
turah iyunuhen enti perduli
olok pedi nyanya kase kite puren
enti nge lepas iken tengkam teruki

muyang kaya musaut miyen
ike gere ara jelen keta bohmi
wan ate we ini reje setan
si engkar kin Tuhan lagu yahudi

reje linge ulak miyen kutempat
karena cukup pakat urum cik serule
sikerna peri nge muamat
kekire jahat iwan tetuke

reje cik serule menurut hakiket
nggih ara paket urum reje linge
sikerna mununuh masuk kulaknat
i taos buet sinume nume

reje linge nge sawah kutempat
nge ara berniet iwanni dede
ara roa lo dabuh timul biet
muriya ipakati beluh mungaro

ibubuh cerak kecek nge lumet
asal gere ne pat meh pedi gure
uwin muriya percaya bulet
reje berkhianat gere iduge

isangkae peri asal betul tepat
beluh berangkat uwin urum reje
we iyunuh gere itakat
sebeb nge iangkat kin anakni reje

uwin muriya beluh bersenang
muninget kin akang beluh i karo
aduh sedepe muninget ri penangang
ku rara ilang daring ku bere

beluh he gaib ku *samarkilang*
nasib pe malang gere itoho
sawah kusone ate we senang
inalamne akang bang renyel i karo

nge mokot-mokot uwin renyel tersepuk
karena lein anguk ara mubayang
isone uwin muloi reduk
nyawa museruk untungku malang

mulo uwin dabuh petungkuk
dabuh pesinguk luh he remenang
ara sara kuala weise roa cabang
wis beraduk ara roa simpang

weis ari linge ara sara pucuk isone
isone setampuk weis roa cabang
weis ari gunung ara sara tampuk
isone muserempuk weis samar kilang

isone ikunulen uwin puberguk
nge pusinguk sebeb nyawa mulayang
nge puampun ampun munahan pepok
rayoh mudedek igelih urum parang

oya kati beral ni *kala singuk*
sawah kukuduk sampai sekarang
igeniring ni weis jerette ikuruk
kadang kase museruk langkahte lelang

nume kase tetaki gere kupujuk pujuk
asal kediken nguk beluhmi panang
buet ni reje sikona kutuk
nguk belang wuk gere ara semayang

tempat ni jeretta sipaling megah
bender meriyah i samar kilang
ari geral muriya tikik mupinah
ari temas ni awah kedah mumanang

ari geral so timul istilah
belo meriah renyel mubatang
oya le tikik siara mubah
oya gere mukunah kene kite bang

reje linge ulak renyel kumah
perasanne gagah sembilang pang
nguk iyunuhne sara heme Allah
sigere bersalah kekanak sedang

reje linge beluh dengan serapah
kuserule berlangkah mungune terang
renyel mungune sentan nge sawah
nge ke itelah ni reje muyang

renyel musaut reje muyang kaya
ike pakat oya nge munge selese
reje linge kurang percaya
reje muyang kaya berperi bese

reje linge miyen bertanya
isihen keta nise jerette
miyen mujeweb ni muyang kaya
atan buntul oya nge ku tanom mate

reje linge kurang percaya
boh ikuruk keta kati selese
musaut miyen mi muyang kaya
ike tentang oya enti mi reje lape

sana sikuruk gere ke dosa
kadang jeretta nge pe mukerpe
reje linge beluh renyel mumaksa
muyang kaya renyel munemah dene

sentan mukuruk kupentas *kucing*
nge pugegining sone reje linge
muyang kaya dabuh pebening
sang male musaing ruwanne reje

sone reje linge miyen muleing
ini kuharap sinting kiyen kureje
iyunuh renyel enti pereh puting
gere ke takut mutaling reje serule

takut di aku puren mujening
udah kase taring kekerus ni kero
ijemaso tubuh ikite kuring
sentan kubanding perange ni kule

oya kati irasi *buntul kucing*
nge taling temaling sawah besilo
perasin oya asal sungguh sinting
ike buntul kucing oja i serule

reje linge ulak miyen surut
ate mongot ngot kin muyang kaya
karena perintah so kurang iturut
lagu gere patut buwet te beta

nge ara sebulen geh miyen menuntut
ulak miyen surut kumuyang kaya
isone ikunei silebih lanyut
cik serule musaut tentang sengede

ike tentang ni oya enti reje takut
nge la kuturut perintah oyawa
kuwan weis so renyel kuanut
perasanku nge manut sawah kutuo

pedehal sengeda beluh itonin
kutempat lein gere erah jema
kuperdu ni uluh isone iparin
wan uluh kawen iserleten sengeda

reje linge ara sak sidik
ini nge pulitik muyang kaya
kerah buetni dele pedi balik
bangun siara usik pora gelana

ini kuperin miyem kureje cik
gelah mi berbalik aku miyen kutoa
ku erah jirim lagu si mubisik
ara mupestik murip ilen jemawa

musaut cik serule lagu si sunguh
enti mulo beluh bang reja ku toa
ini sebenar re male kuunuh
kati enti sungkuh ipanang mata

muyang kaya sinting nge beluh
ari jumpun uluh iyuweten sengeda
ipinahne sengeda memakin jauh
lagu simunusuh iyerah jema

genting serlet renyel irasi
tempat ituni uwin sengeda
perasin oya sawah besiloni
ike lang suai ikunei jema

ari tempat ini renyel we beluh
telkah temunuh erah muyang kaya
telkah oya sine renyel iyunuh
nguk perin ibubuh kin salah mara

igantungne telkah kuatan ni kayu
oya kin penyebut kin reje linge
reje linge kedah itupu
kati osop ragu ate ni reje

nge meta ulak we dengan selalu
renyel mudemu urum reje linge
perintah ni reje ini baru tekun
sungguh natengku osop kekire

nge kugantungan renyel kuatan ni kayu
gelah beta layu idaringi lao
reje cik serule itaose lagu
kedah bangun sigangu nise pora pora

reje linge kurang mungangku
sabe beta lagu *lanang bejeye*
entah kite erah urum-urum aku
betul ka tuju oya atawa gere

muyang kaya beluh bangun ara segen
bangun siara mutan kedah ne pora
dalam pade beta beluh remalan
kuwan uten kati iyengin jema

gere jen sawah renyel ituruhen
cube mi engon so mana jemawa
gere dalih kite kone isawahan
oya bentuk ni beden nume ke jema

itos se kilik urum pakuk peden
kati enti iyengon dalih urum mata
kati enti we kedah kedepeten
dele pedi uten ni muyang kaya

karena langkah ini erah permehen
kati tose jelen bermacam-cara
kediken ini pe kase kedepeten
ke turah iyungeren aku nggih mera

kene reje linge gelahmi sawah
gelah tures iyerah enti beta beta
ara sekejepmi selese teridah
nge tures iyerah terang urum mata

ike lagu ini ke gere aku salah
nume ke telkah ini muyang kaya
reje cik serule nge telas cogah
salak ke mubah kedah ara pora

reje cik serule miyen bermadah
ike pasal mungunah aku gere mera
muninget aku do sa ku Allah
jema gere bersalah iyuwetan nyawa

biyer perin reje aku bersalah
aku bersumpah selama lama
oya kati aku munos elah
ku bubuh telkah lagu serupe jema

sone reje linge nge dabuh peperngah
asal gere le turah naku pe beta
si karena janji nge mutahabakah
besilo nge mubah gere aku dawa

karena sana wa kati kupetetah
kin kiteb rampah gere percaya
puren kase kerejen ni minah
besilo turah kite berusaha

akhir ni cerak jut kin berakah
kedik mutetawah isone pakewa
sawah ku besilo perin *genting telkah*
oya asaliyah gerald ni tempat oya

nge meta reje ulakmurum kumah
kedah itetah baring sesana
nge mari oyar reje berpisah
reje *joharsyah* muniro do'a

besilo aku gelah berlangkah
enti ara sanah urum bala mara
muyang kaya menjeweb insya allah
enti mukekunah ampun pe beta

kuseder miyen kisah kucari
enti kuwen kiri musimpang siyur
edet sedenge singe muapeti
sagi pendari bayar cap usur

linge serule siara muperi
kuseltan ali usur mukamul
kuseltan acih usur imayi
biyaya nenggeri kone mukampul

sikarena seltan ku aceh minah
seltan alisyah daulat si kaul
gere nguk i dawa gere nguk ibantah
oya renyel salah ari jelen betul

tiep ujung ni tun renyel iyemah
turah kase sawah kero sekemul
daulat pertama oyale alisyah
enti kase salah urum muraul

seltan acih ara bermadah
munyeder daerah kurakyat jelata
luesni tanoh seltan mumerintah
kata istilah seltan berkata

akat u timur uh pasir putih
u barat kabih durin tangkuk raja
akat u laut labuhan pukat
akat u darat uh gunung linga

linge serule renyel mupakat
beluh we berangkat kukutereje
menjule *cap usur* oya kudaulat
menurut edet gere nguk gere

masing-masing reje munemeh berat
kuli munangkat barang ni reje
sikarena acih so gere la dekat
ber meh owat munarung rime

reje cik serule munemah kuli
sengeda imayi beluh oya sine
taring sengeda reje enggih berhi
takut we terjadi si nume nume

konotni cerak singketni peri
nguk perin rami beluh kukutereje
nge berganti lo berbilang ingi
enggih muhali seli jarak ari bele

renyel muhadap kuseltan ali
daulat neggeri seri paduka
reje reje sone matjari
roa pendari linge serule

gere ne naru kedah icari
iserahan upeti kuseri paduke
cap urum usur hasil neggeri
kuseltan asli daulat muliye

iatan bale reje musapat
munosah manat seltan alisyah
begini hukum begini adat
mudawat kesemat munosah perintah

sengeda ituyuh tengah pu amat-amat
upih ikekerat ipumu e lopah
isone berlo lo sana lin buet
meminter mubawat rupeni gajah

ara mubelale ara mugading
kolak kemiring nge lagu birah
beden kaul uki e lacing
pebetul kiding mutapak redah

nge meta seltan mata sembeling
seltan mulaing wan mahkamah
aku mungune dengan sungguh sinting
cube masing-masing kutuyuh so munerah

rupeni sana so tengah ikareng
gamar ni benatang sitengah itetah
ara ke i gayo oya benatang
seder pe terang dengan karna Allah

reje menjeweb secara bimang
gere ara le bang daulat khalipah
ike lagu noya rupeni benatang
siarape beruang atawa telkah

seltan turun dengan memang-mamang
mungune terang kusi mutenah
rupeni sana si tengah ikarang
heran tercengang gere penah kuerah

sengeda menjeweb dengan terus terang
sitengah kukarang rupeni gajah
sidele penadi isamar kulang
ara wa i bintang mejen bertunah

isone bewene seba hulu balang
salake ilang nge telas cogah
seba ari kiset munereh benatang
kusi jep pematang kite mumerah

lagi munengkame nume buet gampang
gere munengkam musang atawa telkah
oyale sebeb benne hulu balang
kati munyugang pora ku khalipah

isone seltan renyel mumerintah
itiro e gajah ku ulubalang
ku kutereje turah i emah
gere nguk ibantah urum i sugang

ku linge serule iberatan nemah
turah iyosah oya benatang
tali kekulit renyel itetah
penengkamni gajah itemet jantang

linge serule ulak berlangkah
mengenal gajah bintang dikarang
reje linge lagu si mangan matah
momos susah sengeda bujang

lagi muninget kin leing ni rampah
muloi teridah isone mubayang
sana sitos gamarni gajah
akhir re payah kite berkejang

oya kati kuperin kumuyang kaya
ike anak oya biyak nos halang
ketape reje gere percaya
ini anak mumapa celaka itupang

we kase kunul atan si rata
kite we sinyanya tulak kukarang
ini sulu sulu nge terang nyata
ketape muyang kaya olokdi sayang

isone mungune mi muyang kaya
ku uwin sengeda berterus terang
gere ke kite kase ku nyanya
isihen kase ara gajah mukawang

isone menjeweb uwin sengede
ike tentang noya enti ama mumang
ike tentang gajah kuperin pora
asal kite mera perkara gampang

ari kuterje ulakremalan
sawah ku kebayakan isone musimpang
reje linge mupinah jalan
nge kiser kuwen ate nggih mera senang

sengeda bernipi tekedir ni Tuhen
beluhmi remalan renyel ko ku bintang
singah kase ko ku linung bulen
gelah kiser kuwen kapit pematang

aku le abangmu muriye serinen
gelah ku ungeren enti ko bimang
sone aku derong bertunah beden
nge kuserupenen gajah berubang

sikarena aku nge iyunuhen
nge nasib ni beden isamar kilang
kadang enta aku sinting kin kerben
ketape ko puren insya Allah senang

jege soboha sengeda berkata
kumuyang kaya berkata terang
kite berlangkah gelah bacar pora
sebab gajah ara ikampung bintang

iwan amalku nge terang nyata
si kune kin carai turuhne terang
munungken gajah kati mera kona
karena gajah oya roh ini abang

mari mangah soboh uwet sengeda
urum muyang kaya berlangkah mamang
gere ku uken gere ku toa
kutempat oya lining *bulen bintang*

isone mongot bujang sengeda
reje muyang kaya pe luh he remenang
muninget kin anak bujang muria
iyunuhni jema isamar kilang

idepetne gajah tengah bertunah
isone pegulah iwan berawang
rupe ni gajah putih mugapah
gere ara merah mucampur ilang

tali kekulit renyel itetah
isone iluah ari wan pempang
renyel ibubuh kurongokni gajah
sitengah bertunah iwanni berawang

gajah oya sine gere mungunah
gere olok juah nguk i dang dang
sentan mukune kin bluh mu gelapah
beluh renyel luah musangka kukarang

iyarungne sange nge meh mutewah
kayu murebah nge meh mugulang
pantas musangka hacarni langkah
meminter sawah kuatan pematang

oya kati perin bergeal *arungen*
i linung bulen sampai sekarang
geral oya ari mulo jahman
mungune mi serinen kukampung bintang

uwet ari sone renyel kutenamak
sangka e jarak lagu si julen
itunung renyel remalan tapak
sawah kutenamak nge kona miyen

renyel i temet ku atu kaul kolak
kati enti mugeradak musangka miyen
luah ari penemet tali musintak
atu koul kolak nge mubekaten

sawah besilo atu mubeket
bekas ni temet tali penikoten
ari kena olok mukersat kersat
tali temet renyel mumangan

atu palit gere musuwet
mukelung tempat tali penemeten
ikampung tenamak isone gewat
icube dekat beluh iyengon

gajah musangka ku pulo sange
tersone dene kusamar kilang
itunung miyen tali mare are
kusi beluh he geremusimpang

gajah itunung urum berdedele
sawah renyel pake kusamar kilang
bujang sengeda urum sungguh nate
sawah kusone kujeret ni abang

i wan weis bender muriyah
gajah pegolah wan weis tenang
dekat penadi jeret ni meriyah
isone gajah derong bersenang

tengah pederong isone gajah
sengeda sawah urum reje muyang
iperine kami olok pedi payah
mu nunung ko gajah berletih kejang

iyamat tali tegu kudarat
i kin ni uwet gajah siderong
ketape gajah gere mera mentot
gere mera mesot enti mulo jenjong

muyang kaya pikir nge pipet
gere mura mugemet gajah si medong
benne jema nge dabuh berongot
nge dabuh kiset male seba pong

isone berteduh nge dabuh sengsot
kune keta ikot kati mera mununung
perah mulo akal enti kekire konot
enti mokot-mokot kite mu komong

bujang sengeda sekejeb ongot
dabuh we mongot louh ku iyung
muninget kin abang mucere mokot
muninget bertebet terucep untung

dabuh sengeda munosah penerang
gelah aku bang munos cara
ku erah kite ni nge payah kejang
buge kadang-kadang mera we kona

icube ling lagi si donang
lagu si nenang inarun pora
enti mi tali olok itegang
itiro kasih sayang kadang pe mera

dan lagi pumu icube ikemang
mejen itatang pumu siroa
iguel kayu lagi si gernang
enti itetegang tali ipaksa

pora pe leing enti mugerantang
beden ilelingang enti berjenta
gerak ni beden enti mamang-mamang
enti bangun si jekang kernot anggota

sekalien peri bujang sengeda
itunung jema asal mureramang
ibubuh tari lagu berda-da
ijentik anggota mugerak kerlang

ibubuh jangin lemut suara
ibubuh sapa uwetmi bujang
uwetmi reje arah mu liya
kujantung rasa itason sayang

kuatas kutuyuh pumu siroa
lagu muhun ni jema pumu itatang
nge menta uwet gajah pedora
delem pede beta sesuk petenang

gere mera melangkah keder seneta
gere ruh cara ilen ne bang
miyen berkata bujang sengeda
semenegu gajah gelah jema bujang

nge beta buwet gajah pe mera
karena nge ara jema si bujang
tali penemet tegunne pora
beluh gajahpe mera langkah muganjang

ara simunawar ara si mubedak
karena ate galak mutamah senang
oya mulo asal pangkat mucerak
ara *pengulu bedak* ara *penghulu bujang*

ara simumangir ibubuh mungkur
tene bersyukur atewe riang
oyale kein pangkat puren mesehur
pengulu mungkur masuk wan bilang

ara i sone asal tari guel
si nge mu enel sampe sekarang
ipepok kayu batang ni gerupel
isone iguel tungul urum atang

ari sone asal ni tari
sawah besiloni singe terkemang
iwan pengerjen munuweten bayi
iperin tari bintang dikarang

sengkedah gajah oyale bayi
jema sibertari muniro kasih sayang
nge mutulun nguk dabuh matjari
isone baru beyi bertari nuncang

jaman pudaha singe muperi
kediken tari salah musimpang
jema oya renyel isalahi
oya kati beyi iejer terang

gere lagu buet jaman besiloni
orop nge bertari gere mepat lingang
sentan museluk tangang berahmana
nge lagu kedidi kiding itatang

singket ni peri konot ni madah
itegu gajah penyemah kus seltan
nge menta sawah kutimang gajah
gajah luwah ari penemeten

kuwen kiri nge meh iperah
nge kejang payab mayo ku uten
ketape gajah gere teridah
nge benne susah penat pikiren

ara sara jema munimang arah
kusihen rebah gajah remalan
nge mari itimang renyel berlangkah
nguk renyel mutetah kuweis ni timangan

geip remalan gere jen sawah
isone teridah gajah mumangan
warna putih mampat ierah
kona gajah itengkam miyen

jema simunimang mendepet ijazah
pangkat iosah *pengulu timangan*
ari sone asalle pangkat terjurah
pangkat iosah ari peduke seltan

oya kati irasi renyel timang gajah
gajah luwah musangka ku uten
sebelum oya geral mujamah
gere mutetah geralle ilen

uwet ari sone sawah kurakal
gajah situngel isone itegu
kero itarung gajah ikawal
muminter jomal kapaluh selalu

sangkani gajah kuweis ni jalung
sangka mujelulung sembilang kuyu
sangka oya sine renyel itunung
nasib beruntung gajah nudemu

kati ara bergeral *jalung*
ari jelulung sangka musiyu
sangka ni gajah kupaluh mukepong
nge mujelulung sembilang atu

betale tarikh si nge kutunung
ari jelulung asal dahulu
ke salah benar re gere kutangung
enti kase mujung ujung peluh cerak naru

gerene naru kurawi madah
itegu gajah iyemah kudaulat
ilahni dene ara wa singah singah
malum le langkah asal nume dekat

nume jelen kaul temas mulangkah
uten berolah dene nggih mepat
isihen teduh jamur itetah
isone le gajah keta itemet

ilah ni dene gati pedi luwah
ketentang ni gajah menurut riwayat
ke menurut peri ike gere salah
menos sejarah jep jep tempat

entimi naru kati teir sawah
iserahan gajah kuseltan daulat
tentang upacara gere kukisah
isone musewarah jema edet edet

cume reje linge gere munosah
gere ara gajah nise idepet
isone reje linge nguk perin cangah
atewe gunah rupe e pucet

reje cik serule si ara megah
mendepet ijazah nise ari dolat
puren kase cube miierah
memakin mutamah nise demu pangkat

menurut tarekh kata sejarah
bengis pedi gajah kenakke mulengat
kin reje linge gere ter erah
reje joharsyah sebab kerena jabat

ilah ni dene gere ara sesanah
gere ara gajah male khianat
nge minter sawah iarap ni khalipah
isone le gajah menosah ilamat

sang ituruhne ini jema salah
sang beta kedah menurut tebi'et
gajah putih isone luwah
nge pupererah gere lepas iamat

reje cik serule pe berate gunah
gajah luwah bangun gere ne depet
pedehal reje linge tengah ipeperah
gere ne teridah gere ne mulimet

reje linge beluh temuni
mununin diri beluh musangka
kukerung daroj itunin diri
malum kite ni muluwahi nyawa

karen nge beta ara terjadi
cik serule berperu kubujang sengede
kunehmi akal kin diye ini
kerah gajahni lagu si menta

kerah reje linge we siperahi
ujud kase kite ni kenyel kujema
meh mubetih ini jema sirami
ujud kase gajahni gere mera kona

isone menjeweb sengeda berperi
ike tentang nini ongotmi ama
nge menta beluh sengeda murai
itengkamne tali iyamatne pora

ikusuk ulu ipeperus pipi
ibubuh peri urum manis kata
nge meh tekok jema kuwen kiri
baro tetap ate ni muyang kaya

nge menta mungune renyel seltan ali
sana diye kuli kati mubeta
kin abang reje linge olok di geli
nge bluh temuni enta kusi musangka

isone sengeda menjeweb peri
musisu tuni iseder berite
ini reje linge jahat penadi
nge iyunuhne mate abang muriya

isone paham renyel seltan ali
sana siterjadi urum muyang kaya
meh ibetihe kuwen urum kiri
kulit urum usi nge meh nyata

keber konot pede sehari
sidang menteri iyatan istana
mumimpin rapat oya seltan ali
undang-undang negeri sikune kin cara

salah satue isi ni rapat
isone musuwet tentang kerejeen
karena reje linge gere ara mudepet
memenuhi hejet kureje peduke seltan

reje linge berbuet maksiyet
nyawa iyuwet jejerohen
keta besilo keputusan rapat
jatuh pangkat keta dimakzulkan

itiroi bawar gere nguk munamat
joharsyah sengeda ipecat ari jebeten
selain ari oya menurut ayat
iyunuh wepet sebagai bandingen

sengeda menyahut dengan segele hormat
gelah bayar diyet aenti iyunuhen
si karena aku karib kerebet
menurut ayat di dalam qur'an

lagi reje linge enti ipecat
gelah turun pangkat pora kutuyuhen
mohon sengeda iterima rapat
menurut edet ara perbezaan

pede waktu oya renyel iangkat
sengeda *munamat tampuk* kerejeen
iserahan *bawar iyosan* dolat
nge naik derjet nise ari seltan

warape jema si ara berjasa
simurum urum sengeda mendepet kersi
simunengkam gajah siber usaha
memasing jemawa mendepet rejeki

isone isahen pengulu pengulu
isone demu pangkat terjadi
nume le pangkat biak uru uru
asal nge demu gelihen bebiri

nume le pangkat tepa pelulut
pamarin muserlut ara opat ingi
kuken nggih mudik kutoa lucut
pamarinne manut kuawah ni luni

penghulu timangan pengulu bujang
enti memang bebarang peri
nume le pengulu orop lajang lajang
benar mubatang ari pudahami

pengulu bedak pengulu mungkur
oyape mesehur sawah besiloni
reje muluwem nge munge iatur
tape meh gugur ijaman demokrasi

sengeda ibubun kin reje bukit
mendepet besluit seltan ali
karena mumerah gajah olok pedi sakit
meh gunung bukit nise irai

lagi sengeda dele pedi belit
dele pedi lilit sang mude cari
akal luwes gere ara sempit
baring kune serit mesti nguk iluwahi

reje cik serule ni muyang kaya
anakke sengeda kin kepala nenggeri
lagipun reje nge tue pora
iatan takhta berguyang kaki

keber ini mulo kuteduhen sejep
kati enti silep ralik ni kaji
reje linge nge dabuh map
bawar nge nyap iuweten ni ali

nome nggih mis mangan nggih sedep
baring sidah kutep silemak lungi
bawar osop dalam sekejep
gajahpe munasap gere toho tuni

ku datu beru nge sawah keber
tentang ni bawar nge kiser kiri
atewe macik nge dabuh guser
ate nggih seber mungedep ku ali

isone bercerak ku seltan acih
empu beru munyapih turah kembali
tentang ni bawar gere nguk legih
wo seltan acih kuini imayi

aman gere demu sabi muleleh
gere mera pulih uwes ni ate
isone menjeweb ali seltan acih
olokdi munyapih kerah ananne

tentang ni bawar enti gere ibetih
nge minah alih jema mumai
enti bawar oja turahe dalih
gelah kupilih lain kuganti

seltan acih mumerah damar
kin ganti ni bawar osan kuananni
ibubuh bersalup kedah kin tuker
rupe a bawar tape nume aseli

nge beta empu beru gere ne inger
ara pora museber musejuk ate
empu beru ulak miyen berkiser
sebeb demu bawar biyerpun besi

oyale bawar damar leleh
karena bersapih kedah ikedei
ari karena cerdik seltan aceh
kati enti geh geh lang suwei

untung untung di atas batu
air munulak di dalam gantang
nge teruntung kuatas datu
baring sidah lagu itulak datang

ari acih so ulak ni empu
kenak selalu kubatang ruang
ilah ni dene halangan mudemu
nasib ni empu beruntung malang

kenak ni Allah Tuhen Yang satu
gere mera selalu ike ara halang
sawah ejel ku datu beru
sakit benger ulu sawah ku *tunyang*

isone le jeret datu beru
beluh mi tengku kusone mumanang
sawah besilo ara ilen demu
kapit terulu nikampung *tunyang*

beta kene jema berperi ku aku
kubur ni datu iyatan pematang
tous jema kubah ari dahulu
ikubur ni datu sampai sekarang

meh riwayat tok empu beru
kati enti naru madah dikarang
surut kukuduk keta mulo aku
karena nge mukuyu sengeda bujang

gelah kurenyelen jelen riwayat
sengeda iangkat nge bise terang
karena sengeda iteike pangkat
nge isoli kebet isantiri benang

nge tetap sengeda menjadi reje
ulak ku gayo munatur edet
sekalien rakyat teguh setiye
sengeda reje mudawat kesemat

iyatur e edet awal pemulo
ijaman sedenge musarak opat
ibagie hak menurut jema
kati enti kaco turah mepat-mepat

pertama imem kedua reje
ketige petue keempat rakyat
hak ni tengku imem betami mulo
turah ijege perdlu urum sunet

hak ni reje siturah ijege
gere nguk gere musuket sipet
hak ni petue demikien juge
pantas berulo musidik sasat

hak ni rakyat atawa sudere
nge mepat jema genap mupakat
siopat jenis oyale punce
ingnggeri gayo si muamat

cube itimang urum kekire
memehe manusie isini masyarakat
rawan banan urum tue mude
ke basa besilo oyale staat

enti salah paham kase saudare
ike edet sedenge nguk perin kuwet
ara seba jema nge salah bike
resam sedenge perinne edet

kediken karu isi hi deniye
isone manusie dabuh musyawarat
irayi kuralik edet oya sine
ara ke mayo kedet si opat

pantang ni edet kukaji pora
ara opat perkara oya pe mepat
kemalun edet geh kene jema
siramah biasa musebut suwet

yang pertama deniye terpancang
enta kadang jajahan muwet
iyuwetni jema sekedar girang
umpama terbilang irian barat

yang kedua nahma teraku
menyenoh ulu murebut pangkat
itos uwit bermacam lagu
begini begitu itos kiyet

yang ketiga bela mutahan
jema iyuhuen gere berdiyot
munuweten nyawa pora perdeween
nguk le iperinen masuk kujengkat

yang keempat malu tertawan
murampas bahan buwet maksiyot
melangar edet gere muperaturen
kediken edet jaman bermeh owat

oya pantang ni edet opat perkara
ike sara-sara padi ara mucacat
keta ulak kutulu perkara
ike sinting beta ara terdepot

pertama wan kampung ara mudemu
keta pantik jenuku jema edet-edet
reje reje pengulu pengulu
keta jeret naru itonen sipet

kedue kubelang mupedang perise
igingén mate gelah sampe wepet
beta le kedah dum kotek ke
gere ipedate menurut inget

ketiga kkuuten cekeh beliyung
beluh itunung gelah sampe depet
gere nguk ongot urum medong-medong
asal amat bukong berosop peninget

madu ni edet oya pe ipat
asal nge bulet opat perkara
menukum ni jema edet musapat
kuare isuket timang kuneraca

pertama terjah madu ni edet
ibarat buet ara perkara
leing kasar ringkah mulumpet
lagu si jenkat muluwah ni kata

kedua empah madu ni edet
sang kiset iyukum ni jema
kenakke munukum itos lipet
ituduhi edet sang-sang idawa

ketige keliling madu ni edet
kenak munilet boh enti we kona
itos uwit itos kiyet
pedeahal buwet sintinge ara

keempat juge madu ni edet
menyudi buwet ari kurang ni mata
isuluk isudi kuatas edet
edet si opat ijontok lagu powa

madu ni edet oyale opat
si muatamat ari dahulu kala
sara-sara pedi ara terdepet
isone le edet munyalahi jema

kuseder miyen dewe ni edet
oyape opat jema jahman
pertama angkara mulo tersuwet
nguk perin jahat ara perbueten

misel sara jema munos jahat
roba iperbuwet iweis wonen
oya angkara geh kene edet
oyape mepat nise hukuman

kedue begerel masukara
munos jelata kulain jajahan
rap kukampung deretni kuta
kujajahan jema nise ibuwetan

oya hukumne masukara
ari jajahan ni jema isangkan banan
betawe kejahatan kelein perkara
oya pe beta jatuh hukuman

ketige kahar renyel kucari
kadang ara terjadi sara kejahatan
wan kampung ni jema buwet terjadi
sebilang peri kulain jajahan

kulain jajahan beluh murai
mutamah miyen mi kampung halaman
oya nama kahar masuk wan cari
sebeb buet bi nguk perin rawan

keempat kaharullah miyen kusebut
asal gere patut beta kejadien
kubatang ruang dabuh merebut
gere ara takut kedah gegirangan

dawa edet isone berujut
gere nguk surut menurut jelen
kaharullah geral ituntut
gere ara kisut urum pokok peden

kata istilah cube ipenge
menurut lazim me kene jema jahman
ike ibelang belae kerpe
bela e iruang kedudukan

bitpe sumbeta delemnya sembese
ara hukum ne gere ipernyangan
ike gere beta tentu jema lape
ike orop bese-bese gere mupeneduhen

pertimangan edet ara opat cabang
asal kati terang benne tengku-tengku
memutusni perkara gere barang-barang
gere ireramang baring kusi demu

pertama rujek awal ni bilang
nge munge itimang isone le baru
ke jema bersalah nge mengangku terang
oya ara murengang hukuman demu

kedue ma'as ara muperi
nge munge ipikiri gere sayaptu
salah ni jema keta iampuni
gere ne jadi salah berlaku

ketige diyet muperi miyen
jema ijunuhen nge terang tuju
jema si mate sara bilangan
jema simununuhen ara roa tulu

keempat bela e nge genap opat
oya nge mepat oya nge tentu
sara mununuh sara sidepet
gere nguk ne berdiyot itos lagu

karena oya perkara jenayat
masuk kujahat kene tengku-tengku
pertimangan edet oyale opat
oya muatamat bilang muperdu

asal dele ilen perkara edet
gere ne kusuret kuwani buku
sebeb kiteni tentu nge meninget
perkara edet ni muyang datu

bier wan pengerjen bier juel beli
edet nenggeri sone berlaku
cap urum usur kusagi pendari
ike juel beli bayar teragu

isone pe ara kata istilah
kati enti salah kase museltu
mujuel koro tali ulu turah
ike barang mubenah turah teragu

sah penesoh ike kerje angkap
jari malim tetap ku imem tengku
sah penesah bagi kusegenap
wan kerje angkap kin pemberi tahu

tiap-tiap edet ara kata istilah
si mutahbakah ari dahulu
tikit umpama ini ku osah
kati enti salah ipengen tengku

bujang berama beru berine
ari jemen sedenge singe terbilang
sak sidik usoi perasa
gere nguk gaba-gaba hukum itimang

berat adat atan istana
bertani malu atan batang ruang
beratni tengku atan agama
kelebih ari oya ietong jak unang

harus berwajib ringen berberat
betala inget ari datu muyang
kati perin wajib kedah bertempat
harus wan inget kedah beru bujang

dele penadi kata istilah
lagu pelsapah ike kite timang
ketape makna e relem paedah
gere barang luah tali ni lelayang

kediken h jema berbuet salah
timul pepatah asal kin penerang
kadang ta edet nge salah langkah
perin ne mujurah teratan kerlang

dele ilon peri gere meh kusurah
kete oya terserah sipane munimang
gere ne naru kalam ni delah
lagi gere pernah aku mungarang

gelah kusimpulen empuni edet
menurut inget icecerak jema
ini kutulis menurut depet
dabuh kusuret menurut rencana

ara kīte penge musebut suet
wan kata edet ipeperi jema
kin sana gune e aku pe penat
gerele kudepet rum maham ma'na

ike i atas ara bintang tujuh
ike i tuyuh kal pitu mata
asal umah si pitu ruang
asal penulang pitu perkara

tentang ni makna e si ara kubetih
si ara muteterah geh kene jema
si pitu juhur sipitu acih
beta kedah maneh ijaman pudaha

sipitu *juhur si bentuk* gebali
singe terdiri mulo pertama
sipitu *acih si bentuk* ali
puren terjadi ikuduk ni oya

si kerna oyape nge munge icari
gelah mi i kaji kulain perkara
ike itunung rentang ni tali
naru penadi mumangan masa

ara le miyen cerak muasal
siopat mukawal pitu mun donya
ini kubilang ari mulo awal
pangkat muasal ara pitu jema

yang pertama *kejurun bukit*
si demu beslit kawah mujahna
kedue *kejurun linge*
ara mudeniye oya oe beta

yang ketiga *kejurun petiamang*
watas murentang mukawal lingka
yang keempat *kejurun abuk*
memerintah ilukup mukawal kuta

sipitu modonya ini kucari
menurut peri jema munahma
reje *cik serule* mulo muperi
kedue miyen mi reje *cik kala*

yang ketige reje *cik lumut*
keempat menurut reje *cik rema*
yang kelime reje *cik gele*
keenam delung linge *cik mudasa*

ketujuh *bukit ibelang kejeren*
gere ara leih lebih ari oya
sipitu jema nge kujalin
bilangan pamarin oya le keta

oya le jema ikaman sedange
kene jema tue kuaku berkata
opat mukawal pitu mudeniye
menyeluk bulang tue ikutni jema

inget ni siopat mulo musidik
timbang eni angik m kuwan neraca
suket kuare enti murancang
beridung tunung enti mukela

atur sipitu ini kusederen
kemulo enti puren perbueten ni jema
kediken berat enti pureringen
enti muligen gelah terang nyata

resam empat belas miyen musebut
sukut murai sukut turah beta
tangke murai tangke miyen muturut
urum sukut patut biyer temas nyanya

jaman besilo gelah kucari
karena demokrasi hukum negara
osop keturunan bangsawan tinggi
benne menjadi rakyat biasa

karena manusié asalle jadi
deis urum nabi alim ulama
bier presiden perdana menteri
bier pun kuli gemade papa

sahan sitalap kin pegawai negeri
keta we jadi penggawa negara
bierpun jemawa anak urang tani
keta kunul kukursi gere mukela

sahan jemawa pane mengaji
ulun kenduri ku we kona
nume dalih imem ari pudahami
sawah besiloni we kin ulama

beta umpama kosah teleden
asal demikien ke baring sana
nge masing derjet iyosah Tuhen
nume keturuenen sipaling terhola

besilo kuosah sara kesimpulan
karena kekeberen riwayat lama
dele mupinah mukiser jelen
ampun ku Tuhen sembarang dosa

aku muninget kin resan jemen
nge meh iremuken nge meh benasa
kusalah kuagama atur ni Tuhen
asal turah iremuken enti ne ara

ike kere salah menurut timangan
sana si osopen sampe nge pana
aku pe setuju tentang keturunen
enti lagu jemen enti pe beta-beta

sahan si pane oya kin tunungen
heme ni Tuhen oya dele ni jema
enti ama e reje turah we seltan
iperin gurulen ari jemen pudaha

salangkan nabi rasul ni Tuhen
gere le keturunan bubun kin ambiya
nabi nuh oya kin teleden
anak si jadenen gere percaya

silebih kurang kutiro ampun
kutiro muhun enti kincela
baring sekidah rawi kususun
gere bertalun syeriet agama

ari ralikke riwayat muhimpun
dele pedi bangun riwayat lama
mejen seba seltan mejen kejurun
edet isusun reje sengeda

sekalien peri singe terkarang
ke ara musimpang ari agama
sikerna agama oya kin batang
silebih kurang anuten kutoa

melengkan jaiz siara mulapang
sigere musugang ari agama
ike perdlu sunet oya terlarang
enti ara kadang mucabang roa

jejari sepuluh ini kutatang
ike cakap ramang enti ara dawa
ike umah ayu enti ara tupang
enti bubuh kalang itanoh rata

kediken ara umurku panjang
kegere muhalang urum bele nara
kerejen cik male kukurang
kusahan die terang aku bertanya

atengku pekekit mucampur bimang
kegere kurentang riwayat oya
mustahil kerejen gere mubatang
pedehal terang musatah kata

lebe kader siara mubayang
nume le sembarang sara ulama
kediken keturunan tentu le terang
gelah kusone aku munyapa

kene jema bebesen urum kute lintang
sampe sekarang ara ilen jema wa
kemunyidik aku gere mamang
sebeb kin gerantang aku takut kona

amin ya Allah Tuhan penyayang
tamat kukarang riwayat lama
ike ara gelap tentu ara terang
ike ara senang tentu ara nyanya

tamat

Balu Atu, 7 rab, akhir 1379
5-10-1959



Perpustakaan
Jenderal Ke

959.

AB

S

